

## Rom adi letama

### *Pol na waikaiwama*

Kapore yau banagama Rom nopone miemien-imima,

<sup>1</sup> Taugu Pol, Yesu Keriso na taunoyama, Mamaitua ya yokoegu be ya vinegu da taugu apasol Mamaitua varinama verenama yà rauguguyena.

<sup>2</sup> Uma varinama verenama inam boni Mamaitua na perovetama ġarodie ya sauga be na bukama babaunama poranama nopone a girumi be e kenakenana. <sup>3</sup> Uma varinama verenama inam natunama dā Badama Yesu Keriso ya giuena. Tauna tubuġa ġoma yauwane, tauna Deivid natunama,\* be <sup>4</sup> Arua Babau yauwane, tauna Mamaitua Natunama wairewapaninama. Nama Mamaitua yai maġataridana, baninama tauna natunama Arua na rewapanae, gurie ya midisuġu munaġana. Tauna vutuna Yesu Keriso, dā Badama. <sup>5</sup> Tauna na raukiviveree tauma apasol noyanama kè paġona, da eteni banegidima matabudi ka riuedi da taudi sibo Bada ai sumaġe be a voteyeteyena.

<sup>6</sup> Be taumi mate uma damnama nopodie, baninama Mamaitua taumi ya vinemi da taumi Yesu Keriso ġaroġaronama. <sup>7</sup> Uma letanama yà girugirumina, taumi aitauġa Rom nopone ġaromie. Mamaitua taumi yai nuapaġoemi be ya vinemi

---

\* **1:3:** Uma baninama tauna Deivid damnama reresinama nopone ya tubuġana.

da banaga babaumima. Tamadama Mamaitua be Bada Yesu Keriso adi raukivivere be adi subama ġaromie e kenana.

*Pol ya ġoena da sibo Mamaitua na damma Rom nopone ya vakitedina.*

<sup>8</sup> Noġone taugu yau Mamaituama yà kaiwena Yesu Kerisoe taumi matabumi aubaimima, baninama taumi ami waisumaġama dobu matabuna banaga ta giugiuena. <sup>9-10</sup> Mamaitua tauna vutuna yau matamatama, da raġan matabuna taumi yau moiragie yà noġonoġotimina. Uma Mamaituanama taugu yà noyenoyena nuanuaguma tabutabune, baninama natunama varinama verenama yà rarau guguyena. Be yodi taugu yà moimoiragina da Mamaitua na ġoane gavogavo i kenana, taugu sibo è vakitemina. <sup>11</sup> Taugu è ġoe guratena da sibo è kitemi da taugu puyo Arue sibo è utemi da taumi sibo koyai rewapana, <sup>12</sup> bo deġoda taumi be taugu dà waisumaġe sibo tèi kawa duġu vivirana.

<sup>13</sup> Be yà ġoeġoena da taumi sibo koya kataiena da taugu taumi ġaromie veraunama èwai nuanoġonoġotena da taugu sibo è sagumi da ġaromie banaga ġesaudima sibo ai sumaġana, nema eteni banegidima ġesaudima è sagudi be ai sumaġana maika. Be taiparapara ya morabana aubainama nam e vakitemina. <sup>14-15</sup> Taugu yà ġoeġoe kauena da vari verenama taumi Rom ġaromie yà rauguguyena, baninama inam taugu yau noyama da banaga matabudi sibo ġarodie è rauguguyana, avedi da taudi eteni bo nam eteni, katakataidi bo nam katakataidi.

### *Vari verenama na wairewapanama*

<sup>16</sup> Be taugu vari verenama aubainama nam aitau tenaḡa ama nainaire bo ama tunitunimayaḡena, baninama inam Mamaitua na rewapanama da aitaḡa tawai sumaḡana ei yawasanidina, noḡone Jius banegidima ḡarodie, be muriḡa dobu ḡesaudima. <sup>17</sup> Uma varinama verenama e riuriuedana da nema Mamaitua e vovo kaukauedana da tauna matane dā yawasanama e didimanana. Inam matabuna dā waisumaḡe e voiedina. Baninama girugiruminama porane umanama a girumina, “Didimana baneginama tauna waisumaḡe tokare yawasana e banavina”.

### *Banaga matabuda dā gewagewama*

<sup>18</sup> Mamaitua na medima marae e yovoyovona banaga matabudi aitaḡa Mamaitua nam tima vivivivire be na ḡoanama nam tima voivoiena ḡarodie, be taudi ḡarodie riukaua ta rawarawa koakoana, <sup>19</sup> baninama banaga matabudi Mamaitua na voiamata matabuna a kataiena, baninama Mamaitua yaba ya voivoiedina tawai maḡataridana da tauna e miamiana. <sup>20</sup> Baninama pakane be ya naḡo da yodi avedi da Mamaitua e miamia moisirina be taudi yaḡoro sibo a kataie da tauna e miamiana, baninama yaba matabuna ya voivoiedina, yaḡoro matedie ta kitekitedina. Inam yabedima a kitedi be sibo a kataie da Mamaitua e miamiana, be na rewapanama kenakena nonoḡine yaba matabuna ewai badedina. Vutuna aubainama taudi nam tokare ta gudu-taraḡa be teneteneḡina.

<sup>21</sup> Avedi da taudi Mamaitua a kataiena be yağoro taudi nam isanama tima kaikai sugusuğuna da tauna Mamaitua, be mate nam tima waikaiwena, taudi adi noğotama ya kovi be nopodima kupi ya moğavuna. <sup>22</sup> Taudi ta riuriuna da taudi kabe nuauyauya banegidi, be ibewa da taudi nopodima bua ya moğavuna, <sup>23</sup> baninama Mamaitua miamia nonoğinama ma nenegarina raudunenama a gosepore, be taudi kokoitau a voiedi be a rarau duneedina. Taudi kokoitau a voiedina kitedima maika banaga, kiu, musara be musara daredaredima. Be inam yabedima matabudi waiwaikavedima Mamaitua ai gabu raupunana.

<sup>24</sup> Vutuna aubainama Mamaitua ya miatau-  
tauriedi be ya voie da adi gewagewama yai re-  
wapanana be inam gewagewanama taudi ewai  
badedi da tunidima tawai uta munağedi da adi  
banaga mate yaba waitunimayamayağidima ta  
voivoiedina. <sup>25</sup> Taudi Mamaitua na riukauama a  
gosepore be kaiyovu tawai kawa riukauena, be  
yaba Mamaitua yawai tubuğidina ta rarau duneedina, be nam tauwai tubuğinama tima rarau duneena. Tauna vutuna tà kaisuğu nonoğena. Inam riukaua!

<sup>26</sup> Vutuna aubainama Mamaitua adi gewagewae ya goseporedina. Be yodi waiwaivi adi babadama a gosağa be a nağo da adi banagama waiwaividima mate tawai kawa soğana.† <sup>27</sup> Be inam nama kauinama tenegine, tautauğoma adi waiwaivima a gosedi be a nağo adi banagama tautauğomidima mate tawai

---

† **1:26:** Uma kaidima inam badara na waidigirima.

kawa soḡana. Naumeki da taudime tubuḡidie adi kovoḡama a paḡona, adi voia waigewama aubainama.

<sup>28</sup> Naumeki taudi Mamaitua a gosena, vutuna aubainama Mamaitua ya miatautauriedi be ya voie da adi noḡotama gewegewedima yai rewapana, be adi gewagewama taudi ei badedi da tunidima tawai uta munageḡedi be adi banagama mate yaba waitunimayamayaḡidima ta voivoiedina.

<sup>29</sup> Taudi gewagewa be barabara matedima tabu be tabu tauvoienama banegidima. Taudi nopodima waigogo, gewagewa, waikwina, rauvunuḡa, iḡara, waiwavu kiroḡa, gadoḡai, nopo pikapika, inam yabedima matabudi nopodima ya moḡavuna. Taudi tawai karakarakutu, <sup>30</sup> be giu gewegewedie adi banagama tawai giugiuiedina, be Mamaitua tautuaḡaienama, be nopodima meditupo, seḡara, be taudi banaga taukita tuaḡaiedima, be taudi yaba gewegewedima nopodie tawai tubuḡidina. Be adi dosima ta rawarawa ḡaiḡaiedina. <sup>31</sup> Be taudi nam debedi, taudi nam waisumaḡa banegidi, taudi nam raunuatoi banegidi, be taudi inam biwa taupaḡonama. <sup>32</sup> Avedi da taudi Mamaitua na tarawatuma a kataiena, da taudi aitaḡa nama ta voivoiana tokare guri ta kita saḡena. Be yaḡoro nama ta voivoiana. Be banaga ḡesaudima aitaḡa uma yabedima tauvoiedima taudi mate adi banagama a kitedi be tawai aninedina.

## 2

### *Mamaitua na etarama*

<sup>1</sup> Deḡoda tam banaga ḡesaudima gewagewa ta voivoie be kwa riuriu matai ḡomedina, naumeki tamḡa kwa kawakawa gewagewamna, baninama tam uma yabedima mate kwa voivoiedina. Vutuna aubainama tam nam tenetenēgina da kwa gudutara munaḡem. <sup>2</sup> Be tauma kè kataie da Mamaitua uma banegidima, aitaḡa uma yabedima nama ta voivoiedina taudi tokare e kovoḡidina. Be tauna na etarama inam riukaua. <sup>3</sup> Yau tura, tam banaga ḡesaudima gewagewa ta voivoie be kwa saḡasaḡaidina, be tam mate uma yabedima kwa voivoiedina. Tam kwa noḡonoḡotina tokare Mamaitua na kovoḡama nam kwa paḡo, bo? <sup>4</sup> Tam Mamaitua na kiviverema kuya kitatuaḡai, bo? Mamaitua sibo ya kovoḡimna, be tauna kivinama ya verena aubainama raḡan ewai rauriena da tam am noḡotama kwa vitarena. Vutuna tam nam ku kataie, bo?

<sup>5</sup> Be baninama tam am nopobadoma be nopome nam kuma kuvekuvesana, aubainama Mamaitua na medima ḡarome kwawai potona na medima raḡanine. Inam raḡanine Mamaitua na kovoḡama riuriukauinama ei maḡatarina. <sup>6</sup> Tauna banaga tenatenaḡaḡa aba a voivoiedina, ruvane nama tokare e utedina. <sup>7</sup> Aitaḡa raḡan matabuna Mamaitua na ḡoanama ta voivoie, be uma kaudima, neneḡara, vivira, be yawasana kenakena nonoḡinama ta wanewanedina, taudi tokare yawasana kenakena nonoḡinama e utedina. <sup>8</sup> Be banaga ḡesaudima, taudiḡa adi ḡoanama ta voivoiedina, taudi inam riukaua ta tuaḡaiedi be gewagewa kededima tawai muriwatanedina, taudi tokare medi be kovoḡa

ta banavidina. <sup>9</sup> Piripiri be nuaboya banaga matabudi, aitauga gewagewa ta voivoiedina garodie. No gone Jius banegidima garodie, be muri ga eteni banegidima garodie mate. <sup>10</sup> Be gesaudima nene gari, vivira be suba, banaga matabudi, aitauga vere ta voivoiedina garodie. No gone Jius banegidima garodie, be muri ga eteni banegidima garodie mate. <sup>11</sup> Baninama Mamaitua taudi matabudi ewai nuapagoedina aubainama.

<sup>12</sup> Aitauga Mosis na tarawatuma nam garodie, be gewagewa ta voiena, taudi mate tokare kovo ga ta banavidina, avedi da taudi tarawatu nam garodie. Be aitauga Mosis na tarawatuma garodie be gewagewa ta voiena, taudi mate tokare kovo ga ta banavidina, maika tarawatu nopone ya girugirumina nama. <sup>13</sup> Baninama Mosis na tarawatuma tauwai beavaienama taudi nam Mamaitua matane didimanidi, ibewa da aitauga Mosis na tarawatuma tawai beavaie be ta voivoiena, taudi Mamaitua matane didimandima. <sup>14-15</sup> Avedi da banaga gesaudima taudi nam Jius, be Mosis na tarawatuma nam garodie, be ya goro tarawatu aba ya riuriuena, nama ta voivoiena. Inam ewai magatarana da taudi nopodie tarawatu e kenakenana, baninama Mamaitua nopodie tarawatu ya girumina. Vutuna aubainama adi no gotama e riuriuedina da de go tauna vere be de go tauna gewagewa. <sup>16</sup> Be uma kovo ginama tokare e tubugana ra ganine, Mamaitua banaga adi no gotama waimoisiridima, e etaredina Yesu Kerisoe. Yau varima verenama

mate nama e riuriuna.\*

*Mataira ġavoe be nopoe*

<sup>17</sup> Be tam ġesaumma nemanama? Tam kwa riuriu munaġem da tam kabe Jius banegim, be kwa noġonoġotina da yaba matabuna ġarome naumeki, baninama tam Mamaitua na tarawatum a ġarome, be tam kwa seġaseġarana da tam Mamaitua tura kaukainama. <sup>18</sup> Tam Mamaitua na ġoanama kuya kataiena, be tam tarawatu ġarone katai kuya paġona da tam teneteneġinama da sibo didimana kuya voiena. <sup>19</sup> Be tam kwa noġonoġoti da banaga Arue matapotepotedima adi tauwai kedadokama be aitauga kupie miemienidima adi kodamma tam. <sup>20</sup> Be mate kwa noġonoġoti da tam banaga buebuedima tauboru waididimanidima, be tam seda ġauġaubodima adi tauwai katakataima. Inam riukaua, baninama tam Mamaitua na tarawatum a ġarome aubainama, tam Mamaitua na kataima be na riukauama kuya kataiena.

<sup>21</sup> Inam naumeki, tam banaga ġesaudima kwawai katakataidina, be aba aubainama tamġa nam kumawai katakatai munaġem? Banaga ġesaudima kwa riuriuedi da nam ta danene, be aba aubainama tam mate kwa danedanene? <sup>22</sup> Banaga ġesaudima kwa riuriuedina da nam adi waiwaiwi bo adi tautauġomama debedie mui ta poraġa, be aba aubainama tam mate nama kwa voivoia? Tam kokoitau kwa riuriu tuagaiedina, be aba aubainama tam mate kokoitau kwa rauduneedi? <sup>23</sup> Tam tarawatu kwa seġaseġarena, be yaġoro tam Mamaitua

---

\* **2:16:** Vers 16 inam vers 12 e rarau dudutainina.



isanama kwa kawakawa gewagewana, baninama na tarawatuma kwawai kati kotovina!  
<sup>24</sup> Banaga matabudi dobu ġesaudie Mamaitua tawai dibogina, baninama taumi kami taiye. Girugiruminama poranama nopone e riuriuna maika.

<sup>25</sup> Inam ami vaivaima da kopitom ko voivoiena, inam naumeki, be deġoda taumi tarawatu ko voteyeteyena inam ya vere kauana. Be deġoda tarawatu koi kati kotovina, inam vaivainama kopitom nam baniboruboruna. <sup>26</sup> Be deġoda banaga ġesaudima nam kopitom ti paġona be yaġoro tarawatu ta vovo teyeteyena, inam taudi Mamaitua matane maika kopitom banegidima. <sup>27</sup> Uma banegidima nam kopitom ti paġona be yaġoro tarawatu ta vovo teyeteyena, taudi tokare tam ta saġaiġomem, be ta riuemna, “Avedi da tam tarawatu be kopitom kuya paġona, tam tokare nam kwa yawasana, baninama tam tarawatu tauwai katikotovidima.”

<sup>28</sup> Nam aitau ei rawa-Jius deġoda tauna Jius adi vaivaima e voivoiena. Be kopitom nam tubeġe taunaġa. <sup>29</sup> Riukaua Jiusnama matairinama inam nam tubeġe, ibewa da nopoe. Be kopitom tubeġe inam kavakavanama, baninama inam tarawatu na noyama. Be deġoda nopodama kopitom e paġona inam naumeki, baninama inam Arua na noyama. Inam nama baneginama tauna Mamaitua na kaisuġusuġuma e wanewanena, be nam banaga adi kaisuġusuġuma ima wanewanena.

*Mamaitua banaga matabudi e etaredina*

<sup>1</sup> Vutuna aubainama Jius be kopitom adi verema aba? <sup>2</sup> Adi verema inam a toi kauana, baninama Mamaitua riunama Jius ya ute doke-dina.

<sup>3</sup> Be ġesaudima taudi nam Mamaitua nuanama taupaġonama banegidi. Tam kwa noġonoġotina da Mamaitua inam banegidima nam ei nua-paġoedi, bo? <sup>4</sup> Ibewa ġoma! Mamaitua na saugama e kaikaididina, avedi da tauda banaga kaikaiyovudama, dà saugama tàwai kati kotovidina. Baninama girugiruminama porane umanama ya riuna, “Banaga ta kita da raġan matabuna Mamaitua tam am ġiuma kwa ġiugiuna matabuna inam didimanine, riukaue.”

<sup>5</sup> Be banaga ġesaudima ta riuriuna, “Naumeki, deġoda nama, tauda dà gewagewama ya vere kauana, baninama dà gewagewama kana taiye Mamaitua e tainoġoti da tauna dà gewagewama e noġota porena, inam kedane na saugama e kaikaididina. Vutuna aubainama inam nam i verena da Mamaitua sibo ġarode nuanama yai medi.” <sup>6</sup> Ibewa, inam nam nama! Deġoda nama e tubuġana, tokare nema Mamaitua dobu matabuna e etara bake? <sup>7</sup> Be uma banegidima ta riuriuna, “Tauda dà yawasanama kaikaiyovudie banaga Mamaitua na riukauama ta kaikai suġuna, tokare aba aubainama Mamaitua sibo e kovoġida? Inam nam i verena, <sup>8</sup> agunai gewagewa tà kaigurate be Mamaitua tà sagu da vere e kaigurate.” Inam banegidima tawai tupakaiyovuna da taugu kabe nama e rarau guguya. Ya verena da taudi tokare kovoġa ta

paḡo.

*Nam aitau tenaḡa didimana banegina*

<sup>9</sup> Be yodi nemanama? Tauma Jius veremai, nam banaga ḡesaudima maika, bo? Ibewa! Bani-nama kaite è riuna da Jius be banaga ḡesaudima matabudi gewagewa banegidima. <sup>10</sup> Maika giru-giruminama porane ya riuriuna nama, “Nam aitau tenaḡa didimana banegina, naumeki ibewa ḡoma.

<sup>11</sup> Be nam aitau tenaḡa nuauyauya banegina, be nam aitau tenaḡa Mamaitua na kedama ima wanewanena.

<sup>12</sup> Matabudi Mamaitua a mia tautauriena, be yodi matabudi nam banibiribiridi.”

<sup>13</sup> “Taudi gayedima kokoaga gayedima maika be adi giuna kaikaiyovudi be gewegewed-ima.” “Taudi menedima maika mota sarama.”

<sup>14</sup> “Taudi mududie waitaratautau be nopodima nuāḡoraḡora ya moḡavuna.”

<sup>15</sup> “Taudi tauwai guri makai banegidima,

<sup>16</sup> be adi yawasanae raukivigewagewa be nu-aboya ya moḡavuna,

<sup>17</sup> be suba kedanama nam ti kataiena.”

<sup>18</sup> “Taudi Mamaitua nam tima vivivivirena.”

<sup>19</sup> Yodi tè kataiena da aitaḡa tarawatu ewai badedina taudi sibo tarawatu matabuna a voteyeteyedina. Vutuna aubainama taudi tokare nam ta gudutara be teneteneḡina. Be ibewa da banaga dobu matabuna nopone Mamaitua na etarae tà miamiana. <sup>20</sup> Vutuna aubainama aitaḡa tarawatuḡa tawai muriwatanena taudi Mamaitua matane nam didimanidi. Baninama

tarawatu nam e voie da tauda didimana tà banavi, ibewa be tarawatu na noyama inam ei kataidana da deḡo tauna gewagewa be deḡo tauna vere.

*Didimana inam waisumaḡe*

<sup>21</sup> Be yodi didimana kedanama Mamaitua yai maḡatarina inam ḡavoe, be nam tarawatue. Be peroveta be tarawatu uma kedanama vaunama ai matematenana. <sup>22</sup> Yodi Mamaitua banaga e kawa didimanidina, aitaḡa Yesu Keriso ḡarone tawai sumaḡana, avedi da tauda noḡone banaga vereda bo gewagewadama, <sup>23</sup> baninama banaga matabuda gewagewa tè voiena aubainama nam teneteneḡina da Mamaitua ḡarone sibo tè tava.

<sup>24</sup> Vutuna aubainama Mamaitua na rauki-viveree ya kawa didimanidana be inam kawa didimaninama ya ute yababedana, nam maesa mate. Nama e voivoiana, baninama Yesu Keriso yai yawasanidana. <sup>25</sup> Mamaitua Yesu Keriso ya vine be ya guri da kosininama ya rauḡini da banaga matabuda dà gewagewama e koḡa porena deḡoda tàì sumaḡena. Inam kedane Mamaitua yai kataidana da tauna didimaninama, baninama boni tauna banaga adi gewagewae ya kitakita poredina be nam i kovokovoḡidina. Be yodi inam gewegewedima Yesu kosinine yai maesidina. <sup>26</sup> Be mate Mamaitua yai kataiedana da tauna didimaninama, baninama yodi raḡanine banaga aitaḡa Yesu tawai sumaḡena, taudi matabudi Mamaitua e kawa didimanidina.

<sup>27</sup> Be yodi teneteneḡinama da sibo tauda tè seḡarana, baninama tè yawasanana aubainama, bo? Ibewa! Baninama yawasana tè paḡona

nam dà noyama veredima aubaidi, ibewa da waisumaḡa Yesu Keriso ḡarone yawasana tè paḡona. <sup>28</sup> Vutuna aubainama tauma ka riuriuna da banaga yawasana e paḡopaḡona inam waisumaḡe, be nam dà noyama veredima aubaidi.

<sup>29</sup> Mamaitua tauna tenaḡa, Jius be eteni banegidima adi Mamaituama. <sup>30</sup> Baninama Mamaitua tenaḡa aubainama, tauna Jius be eteni banegidima e kawa didimanidina, inam waisumeḡinama tenegine. <sup>31</sup> Be yà riuriuna da waisumaḡa inam ya saḡa guratana. Be yodi nemanama, tarawatu nam baniboruboruna, bo? Ibewa, waisumaḡe inam tarawatunama tà vovo teyetejena.

## 4

### *Eibraham na waisumaḡe Mamaitua tauna ya kawa didimanina*

<sup>1</sup> Eibraham tauna bonimai tamamaima. Be uma giudima ḡarodie aba tauna ya banavi?

<sup>2</sup> Deḡoda Eibraham na noyama veredie Mamaitua i kawa didimanina, naumeki da banaga matedie sibo ya seḡarana be nam Mamaitua matane. <sup>3</sup> Baninama girugiruminama poranama umanama ya riuna, “Eibraham Mamaitua yai sumaḡena, vutuna aubainama Mamaitua ya kawa didimanina”.

<sup>4</sup> Raḡanine banaga e noyanoyana, tauna na maesama e paḡopaḡona, inam nam tà riuna ‘puyo’. Ibewa da tauna ya noyanoyana maesinama e paḡopaḡona. <sup>5</sup> Be Mamaitua ḡarone inam na tabu. Banaga aitu nam

ima noyanoyana, be Mamaitua banaga gewegewedima taukawa didimanidima e waisumaḡena, tauna na waisumaḡama aubainama Mamaitua tauna ei yawasanina.

<sup>6</sup> Be Deivid uma giunama tenēginama ya giuena da nuavere baneginama aitou Mamaitua e kawa didimana yababena, be nam na noyama maesina.

<sup>7</sup> Tauna umanama ya riuna,

“Nuavere taudi aitaḡa adi voia waigewama ya noḡota poredina

be adi gewagewama ya tauriedina.

<sup>8</sup> Be nuavere tauna aitou na gewagewama tokare Bada nam e noḡota watane”.

<sup>9</sup> Uma giunama Deivid ya giugiuena Jius banegidima aitaḡa kopitom a paḡopaḡona taudiḡa aubaidi bo banaga ḡesaudima kopitom nam ti paḡona mate aubaidi? Aba taugu è riuriuena ko noḡoti! Mamaitua tauna Eibraham na waisumaḡe ya kawa didimani. <sup>10</sup> Be airaḡan Mamaitua Eibraham ya kawa didimani? Noḡone kopitom ya paḡo doke bo muriḡa da kopitom e paḡona, be Eibraham ya kawa didimani? Ibewa! Noḡone Mamaitua Eibraham ya kawa didimani dokena, muriḡa da kopitom ya paḡona.

<sup>11</sup> Be inam kopitomnama ya paḡona, baninama inam yai matairana da tauna noḡone didimana ya paḡona na waisumaḡama aubainama. Tauna muriḡa da kopitom ya paḡona, be noḡone Mamaitua tauna ya kawa didimana dokena. Vutuna aubainama banaga matabudi aitaḡa kopitom nam ti paḡona, be tawai sumaḡana, taudi tamedima inam Eibraham, be Mamaitua inam banegidima ya kawa didimanidina. <sup>12</sup> Be

tauna inam kopitom banegidima mate tamed-ima, taudi nam kopitom taunaḡa ti paḡona, ibewa da waisumaḡa mate. Baninama inam waisumeḡinama teneginama tamadama Eibraham ḡarone be muriḡa da kopitom ya paḡona.

*Mamaitua na saugama waisumaḡe tà paḡona*

<sup>13</sup> Mamaitua ya saugana da Eibraham na parate da nokoi ya naḡona natunatumama tokare dobu matabuna tai buderiena. Nama Mamaitua Eibraham ya riuena, baninama Eibraham na waisumaḡama aubainama, be nam tarawatu, ibewa. Tauna na waisumaḡe Mamaitua ya kawa didimani be inam sauginama ya utena.

<sup>14</sup> Be deḡoda Mamaitua na saugama aitaḡa tarawatu tauvoteyeteyenama i utedina, naumeki da waisumaḡa inam nam baniboruboruna, be na saugama inam kavakavanama. <sup>15</sup> Baninama tarawatu e voivoie da Mamaitua nuanama ewai medina tauda dà rawaḡaiḡaima aubainama. Be deḡoda tarawatu nam e kena, tokare nam teneginama da tà rawaḡaiḡai.

<sup>16</sup> Uma vutuna aubainama aitaḡa tawai sumaḡana, Mamaitua ei yawasanidina. Inam kauine Mamaitua yawasana e uteute yababedana. Be Eibraham natunatumama matabudi riukaua da Mamaitua na saugama ta paḡona, nam tarawatu tauwai muriwatanenama taudiḡa, ibewa da aitaḡa tawai sumaḡana maika tamadama Eibraham, taudi mate sauga ta paḡona. <sup>17</sup> Girugiruminama porane umanama ya riuna: “Taugu è voiem da tam dam toitoi tamedima.”

Vutuna aubainama Eibraham tauna matabuda Tamadama Mamaitua matane, baninama tauna Mamaitua yawai sumaġena. Mamaitua tauna yai rewapana kauana. Tauna banaga gurig-uridima ei yawasanidina, be tauna yaba nam adi kaba tubuġa, be mudune e vatodi da ta maġamaġatarana.

<sup>18</sup> Eibraham yai sumaġa be ya noġotadidina, avedi da nam sibo ya tubuġa, be yaġoro nama ya tubuġana. Da tauna dam toitoi tamed-ima, maika Mamaitua ya riuriuena nama, “Am damma tokare ta toina, maika kipora.”

<sup>19</sup> Eibraham ya kataie da tauna ġaubonaġa sibo ya gurina, baninama tauna kaite na modima 100 a kovina. Be na visarama Sera yai kaikaipoki be kaiteka yai rawa dosina. Be yaġoro Eibraham Mamaitua na saugama yai sumaġena da tokare na visarama Sera ei natunana, <sup>20</sup> be tauna Mamaitua na saugama nam i noġota bekubekuenta. Ibewa da na waisumaġama yaġoro yai rewapana kauana, baninama tauna Mamaitua ya kaikai suġuna. <sup>21</sup> Be Eibraham ya katai kauena da Mamaitua aba ya sausaugena tokare teneteneginama da e voiena. <sup>22</sup> Baninama Eibraham na waisumaġedidima Mamaitua ġarone ya boruna, vutuna aubainama Mamaitua Eibraham ya kawa didimanina.

<sup>23</sup> Uma giudima, “Mamaitua Eibraham ya kawakawa didimanina nam taunaġa aubainama ti girumina”, <sup>24</sup> ibewa da tauda mate. Baninama Mamaitua dā badama Yesu, guriguridima nopodie, be ya kawa midisuġu munaġena. Deġoda tòi sumaġena, tauda mate e kawa



didimanidana. <sup>25</sup> Yesu tauna dà gewagewama aubaidima ai gurina. Be tauna gurie ya midisuḡu munaḡa da tauda e kawa didimanidana, Mamaitua ḡarone.

## 5

### *Mamaitua be tauda poude suba e kenakenana*

<sup>1</sup> Yodi Bada Yesu Keriso dà waisumaḡe tauda ya kawa didimanidana, vutuna aubainama yodi tauda be Mamaitua poude suba e kenakenana.

<sup>2</sup> Dà waisumaḡama aubainama Yesu Kerisoe tè verau be inam raukiviverenama Mamaitua ḡarone tè paḡona. Be yodi ma mosarida tàwai rabana da Mamaitua neneḡarinama e utedana.

<sup>3</sup> Nam inam vutunaḡa, be mate tàì nuaverena dà wainuatoitoie, baninama tè kataiena da wainuatoitoi e voie da tokare tauda tà kaiguratena.

<sup>4</sup> Be kaigurata e voie da tokare tauda tàì rewapana kauana. Be rewapana e voie da waisumaḡedidi e tubuḡana.

<sup>5</sup> Be uma waisumaḡedidinama aubainama tokare nam tàì nuaboya, baninama Mamaitua na wainupaḡoma Arua Babaue nopode ya ḡini porena, baninama tauna Arua Babau ya utedana.

<sup>6</sup> Raḡanine tauda yaḡoro gewagewae tè miamiana, tauda inam Mamaitua na ḡaviama. Be raḡan boruborune Keriso ya gurina aubaidama.

<sup>7</sup> Banaga deḡoda tokare turanama tenaḡa verenama aubainama e gurina. <sup>8</sup> Be Mamaitua na wainupaḡoma ḡarode yai maḡatarina, inam tauda yaḡoro gewagewae be Yesu aubaidama ya

gurina. <sup>9</sup> Tauna kosinine tauda ya kawa didi-manidana Mamaitua ġarone. Vutuna aubainama yodi tè katai kauena da Mamaitua na medie Yesu tokare ei yawasanidana. <sup>10</sup> Raġanine tauda yaġoro Mamaitua na ġaviama, be natunama Yesu na gurie ya voie da tauda Mamaitua mate yai rawateġei munagedana. Be natunama Yesu na yawasanama e voie da tauda yawasana dosinama tà paġona, baninama yodi tauda Mamaitua na banagama aubainama. <sup>11</sup> Be nam inam yabediġa, be mate tà nuaverena Mamaitua ġarone, baninama tauna Yesu Kerisoe tauda yodi Mamaitua tèi turanena.

### *Adam be Keriso*

<sup>12</sup> Gewagewa dobue ya verauna, inam banaga tenaġa kana taiye be uma gewagewane guri dobue ya verauna. Uma kauine guri banaga matabudi ġarodie ya verauna, baninama matabudi gewagewa a voiena. <sup>13</sup> Gewagewa dobue ya kenakena be muriġa tarawatu ya dobina. Be Mamaitua gewagewa ya kita poredina, inam raġandie tarawatu nam i kenakenana. <sup>14</sup> Be yaġoro Adam na raġanie be ya naġo da Mousis na raġanie guri banaga yawai badedina. Avedi da aitauga tarawatu nam ti kati kotovina, Adam tarawatu yai kati kotovina maika. Adam tauna banaga muriġa e verauna yawai matairena. <sup>15</sup> Be taudi rabui adi yawasanama nam teġenidi, baninama Mamaitua na puyoma nam maika Adam na gewagewama nama. Inam baneginama Adam na gewagewae banaga toitoi a

gurina. Be Yesu Keriso tauna Mamaitua na rauki-viveree noġotaporaġa ya verauġena banaga toitoi ġarodie. <sup>16</sup> Mamaitua na puyoma be Adam na gewagewama nam tai ruvaruva be tenetenegina. Baninama Mamaitua na puyoe banaga toitoi ya kawa didimanidina, avedi da taudi gewagewa toitoi a voidina. Be Adam na gewagewae banaga toitoi ta gurigurina. <sup>17</sup> Uma baneginama tenaġa Adam na gewagewae, guri banaga matabudi yai badedina. Be banaga matabudi aitaugā Mamaitua ġarone noġotaporaġa puyonama dosinama tai anine be ta paġona, taudi tokare Yesu Keriso mate yawasana tai badedina.

<sup>18</sup> Vutuna aubainama Adam gewagewa tenaġa ya voiena aubainama, banaga matabudi a gurina, be Yesu didimana tenaġa ya voiena aubainama, banaga matabudi Mamaitua ya kawa didimanidina da yawasana tà banavina. <sup>19</sup> Be kauinama teneġine Adam na rawaġaiġaima aubainama, banaga matabudi gewagewa ya ragaudina, be Yesu na voteyateyama aubainama banaga toitoi Mamaitua e kawakawa didimanidina.

<sup>20</sup> Mamaitua tarawatu ya utedana, baninama dà gewagewama na morabama ei maġatarina. Be deġoda gewagewa e morabana, naumeki da Mamaitua na raukiviverema e moraba vavasagāna. <sup>21</sup> Vutuna aubainama gewagewa gurie ewai badana, be teneġinama yodi Mamaitua na raukiviverema didimanae ewai badana, be yawasana kenakena nonoġinama tà paġona Yesu Keriso, tauna dà badama.

## 6

### *Tauwai sumaḡa be gewagewa*

<sup>1</sup> Be yodi nema tà voia bako? Gewagewa tà kaigurate be Mamaitua na raukiviverema e moraba, bo? <sup>2</sup> Ibewa ḡoma! Tauda gewagewae tè guri be yodi nemanama gewagewae tà mia bako? <sup>3</sup> Ko noḡonoḡoti bo ibewa da tauda aitaḡa Yesu Kerisoe tè babataitona, tauda yodi matabuda tè babataitona Yesu Keriso na gurima nopone. <sup>4</sup> Vutuna aubainama babataitoe tauda Yesu mate a dobodana. Be tauna gurie ya midisuḡu munaḡana Mamaitua na rewapanama neneḡarine. Be inam rewapaninama teneḡine tauda mate, yawasana vaune tà mianana.

<sup>5</sup> Tauna na gurie tauda tauna mate tenaḡa. Vutuna aubainama na kaba midisuḡue tauda tauna mate tenaḡa. <sup>6</sup> Baninama tè kataiena da tubuḡidama poranama Yesu mate a tuparatu tenaḡena. Vutuna aubainama tubuḡidama gewagewa tauwai nuapaḡoenama yodi na rewapanama ya kovina, be tauda nam gewagewa ḡarone tà yaraga munaḡa, <sup>7</sup> baninama aitaḡu da e gurina, gewagewa nam tauna e taukoni munaḡe. <sup>8</sup> Be tauda tè kataiena da tauda Keriso mate tè gurina aubainama, Keriso mate tokare tà miana. <sup>9</sup> Be mate tè kataie da Keriso ya midisuḡu munaḡana, tokare nam e guri munaḡa, baninama guri nam na rewapanama Yesu ḡarone ima kenakenana. <sup>10</sup> Be Yesu tauna raḡan tenaḡa kava ya gurigurina, gewagewa na rewapanama yai kovina. Be yodi tauna na yawasanama Mamaitua na yawasanae e miamiana. <sup>11</sup> Vutuna

aubainama taumi mate ko noḡotimi da taumi gewagewae koya gurina, be Yesu Kerisoe ami yawasanama Mamaitua na yawasanae ko miana.

<sup>12</sup> Vutuna aubainama nam gewagewa koi anine da tubuḡimima ei bade. Uma tubuḡinama tokare e gurina. Nam gewagewa taumi e sorumi da taumi tubuḡa na ḡoanama gewegewedima koi muriwatanedi. <sup>13</sup> Nam tunimima aiyabinama koi anine da gewagewa ta voiedi. Be ibewa da ko ute munaḡemina Mamaitua ḡarone, baninama taumi gurie be koya naḡona yawasanae. Vutuna aubainama yodi tunimima matabuna Mamaitua ko ute be koi anine da tunimima vutuna vere ta voiedina. <sup>14</sup> Naumeki da yodi gewagewa nam ei bademi, baninama taumi nam tarawatu na waibadae koma miamiana, ibewa da taumi Mamaitua na raukiviverema na waibadae ko miamiana.

*Tauda yodi nam gewagewa ei yarageda*

<sup>15</sup> Be yodi aba tà voie? Tauda Mamaitua na raukiviverema na waibadae tà miamiana, be nam tarawatu na waibadae tama miamiana. Vutuna aubainama yodi gewagewa tà voie, bo? Ibewa ḡoma! <sup>16</sup> Koya kataie bo ibewa da taumi aitau ko voteyeteyena taumi inam tauna na taunoyama? Vutuna aubainama deḡoda taumi gewagewa na taunoyama, taumi tokare ko gurina. Be deḡoda taumi Mamaitua ko voteyeteyena, taumi tokare Mamaitua na taunoyama be tauna ei yawasanimina. <sup>17</sup> Taumi raḡan tenaḡa gewagewa yawai yaragemina, be Mamaitua tai kaiwena da yodi nuemima tabutabunama koya vitaredi be riukaua

waikatakatainama yai katakataimi be taumi ko vovo teyetyedina. <sup>18</sup> Taumi gewagewae be Bada ya kaiporemi da yodi riukaua na yarayaragama.

<sup>19</sup> Taumi ami noḡotama vovo gwaḡegwaḡedima aubainama, yau giuma teketekedie yà giugiuna da taumi ko kataiena. Boni tunimima koyai utaedi da mira be gewagewa dosidima ḡarodie awai yaragana. Inam nama yodi tunimima koi utaedi da yaba didimanidima ḡarodie tai yaragana yawasana babaunama aubainama.

<sup>20</sup> Taumi gewagewa ḡarodie koyawai yaragana raḡandie, taumi didimana nam ko noḡonoḡotidina. <sup>21</sup> Inam yabedima koya voivoiedina yodi kowai kawa tunimayaḡedina, damodie aba koya banavi? Nam aiyaba da naumeki guri! <sup>22</sup> Be yodi taumi gewagewae be Bada ya kaiporemina da taumi yodi Mamaitua na taunoyama. Vutuna aubainama yodi taumi tenetenēginama da Mamaitua na ḡoanama ko voiedina, yodibe taumi tokare koi rawa babau be damone taumi yawasana kenakena nonoḡinama ko paḡona. <sup>23</sup> Baninama dà gewagewama na maesama inam guri, be Mamaitua na puyoma inam yawasana kenakena nonoḡinama, dà Badama Yesu Kerisoe.

## 7

*Raḡanine banaga e gurina tarawatu na rewapanama nam ḡarone ima kenakenana*

<sup>1</sup> Yau bana, tarawatu ko noḡoti. Banaga e miamiana, inam raḡanine tarawatu tauna banaga ewai badena. <sup>2</sup> Inam maika waivi wainaḡinama.

Raḡanine tauḡoma yawayawasaninama e miamiana, inam raḡanine waivi nam tenetenegina da na tauḡomama e gose. Be deḡoda na tauḡomama e gurina, inam raḡanine tauna wainaḡi tarawatunama e dobidobi porena. <sup>3</sup> Vutuna aubainama deḡoda na tauḡomama yawayawasaninama e miamia be waivi tauḡoma ḡesaunama e naḡina, tauna na badama debane mui e poreporena. Be deḡoda na tauḡomama e guri be waivi tauḡoma ḡesaunama e naḡina, inam naumeki.

<sup>4</sup> Yau bana, uma kauinama teneḡinama taumi mate ḡaromie. Taumi Keriso mate koya guri tenaḡana! Vutuna aubainama tarawatu na rewapanama ḡaromie nam ima kenakenana. Keriso gurie be ya midisuḡu munagaḡana, be taumi yodi tauna ḡaroḡaronama, da taumi ko votana Mamaitua aubainama. <sup>5</sup> Raḡanine tauda tubuḡa yawai dokedana noḡota gewegewedima da yawasanae a noyanoyana. Uma noḡotidima gewegewedima tarawatue a maḡatarana. Vutuna aubainama tauda boni da votavotama guri a tubutubuḡana. <sup>6</sup> Baninama tauda Yesu mate te gurina aubainama, tauda yodi tarawatu na rewapanae be Yesu ya kuvesidana. Vutuna aubainama yodi keda vaunama Arue ta noyana, be nam keda poranama tarawatu a girugirumina ta noye.

### *Tarawatu be gewagewa*

<sup>7</sup> Yodi aba ta giue? Tarawatu taunaḡa inam gewagewa, bo? Ibewa ḡoma! Taugu tokare nam sibo gewagewa e kataie, ibewa da tarawatu ewai maḡatarana. Baninama taugu tokare waikwina

nam e kataie, deḡoda tarawatu nam sibo i riuna, “Nam kwai kwina!”<sup>8</sup> Gewagewa na kedama tarawatu ya banavi be ya voie da nopogue waikwina noḡotidima ta tavatavana da tarawatu yàwai kati kotovina. Baninama deḡoda tarawatu nam sibo i kenakena, tokare gewagewa na rewapanama yai kavena maika banaga guriginama.

<sup>9</sup> Raḡanine taugu ḡaubogue taugu tarawatu nam e kataiena, taugu ma nuaveregu yawasanae è miamiana. Be muriḡa tarawatu è paḡopaḡona raḡanine, gewagewa ya naḡo midisuḡu be yau yawasanae ya saḡana.<sup>10</sup> Dabudine è kataie da taugu è gurina. Tarawatu kabe yawasana i uteutegu da tauna guri ya uteguna.<sup>11</sup> Gewagewa na kedama tarawatu ya banavina, vutuna aubainama ya kaiyovuegu be inam tarawatune yai guriguna.<sup>12</sup> Be tarawatu taunaḡa inam babaunama. Be uma riuvavasagīnama, “Nam kwai kwina” tauna mate babaunama, didimana be vere.

<sup>13</sup> Naumeki, deḡoda tarawatu inam yaba verenama, inam yabanama verenama ya voie da taugu e guri, bo? Ibewa ḡoma! Gewagewa uma tarawatunama verenama ya paḡo be tarawatune yai guriguna. Be tarawatu yodi tà kitakitana da gewagewa inam naumeki gewagewa vavasagīnama.

### *Gewagewa banaga ewai badedina*

<sup>14</sup> Tauda tè kataiena da tarawatu inam Mamaitua ḡarone be ya yovona. Be tauda banaga tarawatu waimuriwatanenama tè gwaḡana aubainama, gewagewa tauda ewai badedana.



<sup>15</sup> Be yaba barebaredima yà voivoiedina, taugu nam e kataiena da aba aubainama yà voivoiedi. Taugu yaba veredima è gōeḡoedina sibo è voiedina, be yabedima nam ama voivoiedina. Be taugu yaba yau kaba tuaḡaiedima, vutudi taugu yà voivoiedina. <sup>16</sup> Be deḡoda yaba barebaredima nam ama gōeḡoedina, be taugu yà voivoiedina, inam taugu yàwai aninana da tarawatu inam riukaua. <sup>17</sup> Vutuna aubainama nam taugu inam yabedima barebaredima ama voivoiedina, ibewa da gewagewa nopogue e kenakenana, tauna vutuna e voivoiedina.

<sup>18</sup> Baninama è kataie da nopogue nam aba verenama ima kenakenana. Nopogue ḡoana riukaua da e kenakenana da vere sibo è voiena, be nam rewapana ḡarogue da yà voie. <sup>19</sup> Baninama yaba yà voivoiedina, taudi nam yau ḡoana da sibo è voiedi. Be yaba voiedima nam yau kaba ḡoedi, inam yabedima yaḡoro da yà voivoiedina. <sup>20</sup> Be deḡoda yaba yà tuatuaḡaiedina, be yaḡoro yà voivoiedina, inam kaudima tawai kataigu da nam taugu inam yabedima ama voivoiedina, be ibewa da gewagewa nopogue e kenakenana, tauna vutuna e voivoiedina.

<sup>21</sup> Dobudine è kita da raḡan matabuna inam umanama e tubutubuḡana: Raḡanine è raurubu da kabe vere è voivoie, da gewagewaḡa è voivoiena. <sup>22</sup> Naumeki nopogue Mamaitua na tarawatuma yà gōeḡoe kauena, <sup>23</sup> be Mamaitua na tarawatuma nopogue e kenakenana. Be taugu è banavi da tarawatu ḡesaunama tunigue yai rewapana vavasaḡa be e panipaniguna, be Mamaitua na tarawatuma ewai ḡaviena.

24 O kapore, wainuatoitoiguma! Aitau e kais-agugu, be tubuḡa uma gurigurinama yà gose pore? 25 Baninama nopogue taugu Mamaitua na tarawatuma yà vovo teyeteyena, be tunigie taugu gewagewa na tarawatuma yà vovo teyeteyena. Be Mamaitua yài kaiwena, baninama taune dà Badama Yesu Kerisoe ya kuvesiguna.

## 8

### *Yawasana vaunama Arua Babaue*

1 Vutuna aubainama taudi aitaḡa Yesu Kerisoe ta miamiana, taudi tokare nam kovogā ta bnavi. 2 Baninama tarawatu Arua Babaue vutuna yawasana Yesu Kerisoe ya uteguna da gewagewa be guri adi tarawatue ya kuvesiguna. 3 Tarawatu nam tenetenēina da sibo yai yawasanida, baninama tauda tarawatu waimuriwatanenama ḡarone tē gwaḡa kauana. Vutuna aubainama Mamaitua Natunama ya riu-pore yovoḡe be tubuḡa ya utena maika, tauda tubuḡidama gewagewa tauvoienama. Be Mamaitua Yesu tubuḡa ya utena, be inam tubuḡine tauda dà gewagewama kovoginama ya paḡona, be yodi ḡarode gewagewa na rewapanama ya kovina. 4 Vutuna aubainama deḡoda tauda Arua Babau na ḡoane tà miana, be nam tubuḡa na ḡoane, inam raḡanine tauda tenēinama da Mamaitua na tarawatuma tà voteyeteyena.

5 Be taudi aitaḡa tubuḡa na ḡoane ta miamiana, taudi adi noḡotama matabuna tubuḡa na ḡoane e kenakenana. Be taudi aitaḡa Arua Babau na ḡoane ta miamiana, taudi adi noḡotama matabuna Arua Babau na ḡoane e

kenakenana. <sup>6</sup> Değoda tubuğa na ġoanama tà noğota guratena, damonama guri tà banavina. Be değoda Arua Babau na ġoanama tà noğota guratena, damonama yawasana be suba tà banavidina. <sup>7</sup> Nama ta tubutubuğana, baninama tubuğa na wainua noğonoğotama inam Mamaitua na ġaviama, be değoda tauda tubuğa na wainua noğonoğotama tai muriwatanena, tauda tokare Mamaitua na tarawatuma nam tà voteyete. Be nam tokare tà voie be teneğina. <sup>8</sup> Taudi aitauga tubuğa na ġoane ta miamiana, taudi nam Mamaitua timawai nuaverena.

<sup>9</sup> Be taumi nam tubuğa na waibadae koma miamiana. Ibewa! Değoda Mamaitua Aruinama nopomie, naumeki da taumi Arua Babau na waibadae ko miana. Be değoda aita Keriso Aruinama nam tauna nopone e mia, naumeki da tauna nam Keriso ġarona. <sup>10</sup> Be değoda Keriso nopomie, tubuğimima ya gurina be Arua Babaue yawasana ko pağona, baninama Mamaitua ya kawa didimanimina. <sup>11</sup> Mamaitua Aruinama Yesu gurie be ya kawa midisuğu munağena. Değoda inam Aruinama nopomie e miana, naumeki da tokare tauna vutuna, taumi tubuğimima guriguridima mate e kawa midisuğudina. Baninama tauna Aruinama nopomie e miamiana.

<sup>12</sup> Vutuna aubainama yau bana, tubuğa na ġoanama nam na noyama aba ġarode ima kenakenana. <sup>13</sup> Baninama değoda taumi tubuğa na ġoanama koi muriwatana nonoğena, taumi tokare ko gurina. Be değoda Arua Babaue tubuğa na ġoanama gewegewedima koi guridina, taumi

tokare yawasana ko banavina. <sup>14</sup> Baninama taudi aitauga Mamaitua Aruinama ewai dokedina, taudi vutudi Mamaitua natunatumama.

<sup>15</sup> Be Mamaitua Arua Babau ya utemina inam nam e voiemi da taumi taunoya yababa da sibo ko nainaira. Ibewa! Be tauna Arua Babau ya utemina e voiemi da taumi Mamaitua natunatumama. Vutuna aubainama taumi yodi Mamaitua garone ko riuna, “Mamai”!\* <sup>16</sup> Mamaitua Aruinama tauda aruidama e riuriuena da tauda riukaua Mamaitua natunatumama. <sup>17</sup> Yodi tauda Mamaitua natunatumama, vutuna aubainama tauda tokare Keriso mate Mamaitua na buderima ta pagona. Deḡoda tauna na wainuatoitoie tauda mate tai nuatoitoi saguna, tokare Mamaitua nenegarine Keriso mate ta mia tenagana.

### *Ragan muriḡa na yawasanama*

<sup>18</sup> Taugu ya kitakitana da wainuatoitoi yodi ta banabanavidina taudi yawasana tokare e veraverauna garode e tavana, nam mate tai ruvaruva be teneteneḡina, ibewa. <sup>19</sup> (-)

<sup>20-21</sup> Mamaitua yaba matabuna yawai tubuḡidina ta guriguri be ta bova bova yababana, vutuna aubainama ma nuaboyedi ta miamiana. Be inam nam taudi adi goana, be tauwai tubuḡidima na goane nama. Be yaḡoro nopodima ewai noḡotana da raganine Mamaitua na damma nenegarine ta saḡana, taudi mate nenegara ta paḡo da guri be bova adi raganima e kovina. (v 19) Vutuna aubainama, yaba matabuna Mamaitua yawai tubuḡidina, taudi tawai raba

---

\* **8:15:** Aramaic bonane ‘Abba’ inam ‘Mamai’.

be keda ta kitakitana da uma yawasaninama saḡasaḡa vavasaginama Mamaitua na sedama e utedina, dohue yaba matabuna matedie. <sup>22</sup> Tauda tè kataiena da pakane da yodi yaba matabuna ta yakeyakeina maika waivi raḡanine ewai tikana tunimuyanama nama. <sup>23</sup> Be nam yabedima taudiḡa, be tauda mate, avedi da puyo Arua Babau tè paḡona, be yaḡoro tà yakeyakei be tàwai rabana da Bada ei kawa natuneda be tubuḡidama ei yawasanidina. <sup>24</sup> Raḡanine Bada yai yawasanidana tauda tà noḡonoḡotina, da tokare tà naḡona marae. Be tauda deḡoda sibo kaite marae tè naḡona, yodi nam tama noḡonoḡotina da sibo marae tè naḡo. Baninama nam aita u yaba kaite ya paḡo be yodi ima ḡoḡoena e paḡo munāḡe. <sup>25</sup> Be yodi yaḡoro mara nam te kitana, vutuna aubainama tauda nuatauḡa tàwai rabana da marae tà naḡona.

<sup>26</sup> Be mate Arua Babau dà vogwaḡagwaḡae e sagusagudana. Baninama tauda nam moiragi kaua te kataiena, vutuna aubainama Arua Babau Mamaitua ḡarone aubaidama moiragie giu e vatovatodina, baninama tauda nam teneteneḡina da tà vatodi. <sup>27</sup> Arua Babau tauda aubaidama e moimoiragina Mamaitua na ḡoanama ruvane. Be aba Arua Babau Mamaitua e riuena, tauna kaite ya kataiena, baninama Mamaitua banaga babaudama nopodama ya katai kauena. <sup>28</sup> Tauda tè kataie da banaga aitaḡa Mamaitua tawai nuapaḡoena, taudi ḡarodie yawasana matabudi veredima, be pipiri ta tubutubuḡana inam vere taudi aubaidima. Uma banegidima taudi vutudi Mamaitua bonimai ya vinedina na

gōanama ruvane. <sup>29</sup> Be banaga aitaugā Mamaitua ya vinevinedina, taudi ya voiedina maika natuḡominama Yesu, be Yesu tauna tautuaḡa. <sup>30</sup> Be aitaugā Mamaitua ya vinevinedina, taudi ya yokoedina da sibo a verauna tauna ḡarone. Be aitaugā tauna ya yokoyokoedina, taudi ya kawa didimanidina. Be aitaugā tauna ya kawakawa didimanidina, taudi yawasana verenama marae ya utedina.

*Mamaitua na wainuapaḡoe nam aba tokare e dariḡeda*

<sup>31</sup> Yodi aba tà giue? Deḡoda Mamaitua tauda muride e midimidina, aita tokare ei ḡavieda? <sup>32</sup> Avedi da natuḡominama be nam i rabe kwasena, be yaḡoro yai utaena tauda matabuda aubaidama. Be tenegine nama tauna na raukiviveree yaba matabudi e uteutedana.

<sup>33-34</sup> Vutuna aubainama nam aita tenetenegina da ei wavuda, baninama Mamaitua kaite ya kawa didimanidana. Be mate Yesu Keriso vutuna ya guri be ya midisuḡu munaḡana, tauna Mamaitua kasaune e mia be aubaidama e moimoiragina.

<sup>35</sup> Be yodi Keriso na wainuapaḡoe nam aba tokare e dariḡeda. Nam nuaboya, nam naira, nam raukivigewagewa, nam meḡara, nam waikaruwaḡawaḡa, nam iḡara. <sup>36</sup> Girugiruminama porane ya girugirumina nama, “Tam kamtaie raḡan matabuna tauma raukivigewagewa ka banabanavidina, be ta vunuvunuḡimaina maika musara.”† <sup>37</sup> Be avedi

---

† **8:36:** Gurik bonane ya riuna ‘sipu’, be nam ‘musara’.

da nuaboya tà banabanavidina, be yaḡoro tà vaisuba vavasagēdina Yesu Kerisoe, tauna vutuna ewai nuapaḡoedana.

<sup>38</sup> Baninama taugu è katai kauena da Mamaitua na wainuapaḡoe nam aba tokare e dariḡeda, nam guri, nam yawasana, nam anea, nam penama, nam yaba yodi ta tubutubuḡana bo tokare ta tubuḡana, nam aba rewapanidi, <sup>39</sup> nam arua gunume bo dobue, nam aba Mamaitua yawai tubuḡidina, nam aba tokare Mamaitua na wainuapaḡoe e dariḡeda, ibewa! Yesu Kerisoe Mamaitua yai kataidana da tauna ewai nuapaḡoedana.

## 9

### *Mamaitua be Israel banegidima*

<sup>1</sup> Taugu Yesu Keriso matane yà riuriu kauana, be nam ama kaikaiyovuna. Arua Babau nopogue nama e riuriueguna. <sup>2-3</sup> Israel banegidima nam adi waisumaḡa, vutuna aubainama taugu nopogue èi nuaboya da èi nuaboya kauana, be è noḡoti da Mamaitua taugu sibo ya raukivi gewegewegu be taudi sibo yai yawasanidina. <sup>4</sup> Baninama taudi Mamaitua ya vinedina da tauna natunatumama be taudi nenegarinama a kita be na saugama ḡarodie ya boruna. Taudi Mousis na tarawatuma a paḡo be tempol nopone ta tapataparorona, be Mamaitua ya riuedina da tokare ei yawasanidina. <sup>5</sup> Be taudi ḡarodie dede pakanama banegidima,\* be inam damne Yesu

---

\* **9:5:** Dede pakanama banegidima inam: Eibraham, Aisik be Jeikob.

Keriso ya tubuḡana, tauna vutuna Mamaitua, be raḡan matabuna ta kaikai suḡu nonoḡena! Inam riukaua.

*Aitauḡa Mamaitua na damma nopone?*

<sup>6</sup> Taugu yà riuriuna da Mamaitua na saugama nam i kavena. Israel banegidima nam matabudi Mamaitua na dam. <sup>7</sup> Avedi da taudi Eibraham natunatumama, yaḡoro nam matabudi Mamaitua na seda, ibewa. Mamaitua Eibraham umanama ya riuna, “Aisik na dame taugu tokare am sedama è sausaugemna yà utemna.”

<sup>8</sup> Inam baninama umanama: Avedi da taudi Eibraham natunatuḡominama, yaḡoro taudi nam Mamaitua natunatumama, be aitauḡa Mamaitua na saugama tauwai sumaḡenama, taudi inam riukaua Mamaitua natunatumama. <sup>9</sup> Mamaitua na saugama Eibraham ḡarone inam umanama ya riuna, “Taugu yau raḡanima è boruborue taugu yà yovo munaḡana, yodibe Sera gomana tauḡominama tokare e tikana.”

<sup>10</sup> Be teneginama nama Rebeka ḡarone. Rebeka na sedama tautauḡomidima tamedima tenaḡa Aisik, tauda mate tamadama. <sup>11-12</sup> Be Rebeka muriḡa da seda raḡaraḡa e tikedi da yawasana veredi bo gewegewedima ta voiedina, be noḡone Mamaitua Rebeka umanama ya riuna: “Gomana tautuaḡa tokare tasinama ḡarone ei taunoyana.” Mamaitua nama ya riuna, inam tauda sibò tè kataie da Mamaitua na ḡoane banaga e vinevinedina, be nam adi noyama debane. <sup>13</sup> Vutuna aubainama girugiruminama porane umanama ya riuna, “Jeikob nuaguma e paḡopaḡona be Iso è tuaḡaiena.”



<sup>14</sup> Be yodi nema tà riu bako? Mamaitua nam didimana banegina, bo? <sup>15</sup> Mamaitua Mousis umanama ya riuena,

“Taugu yau raunuatoima banaga yà gōeōena nama yà raunuatoiena,  
be yau raukiviverema banaga yà gōeōena nama ḡarone yà raukivi verena.”

<sup>16</sup> Vutuna aubainama banaga yawasana ta paḡona, be nam adi ḡoane bo adi noyama veredima aubaidi, ibewa, be Mamaitua taunaḡa e gōeōena nama e raukivi verena ḡarodie.

<sup>17</sup> Be guyau Pero ḡarone ko kita. Mamaitua tauna ḡarone ya riuna umanama, “Taugu è voiem da guyau kuya tubuḡana, inam taugu yau rewapanama ḡarome yai maḡatari da dobu matabuna ta kita be isaguma ta kaisuḡuna.” <sup>18</sup> Vutuna aubainama Mamaitua na raukiviverema banaga e gōeōena, nama ḡarone e raukiviverena. Be mate Mamaitua e gōeōena nama, banaga noponama e kawa badona.

<sup>19</sup> Be tokare banaga ḡesaumima umanama ko riueguna, “Deḡoda Mamaitua na yawasanama nama, aba aubainama tauna e riuriuna da tauma gewagewa banagimai? Tauda nam teneteneḡina da na ḡoanama tàì ḡake.”

<sup>20</sup> Tam am rewapanama aba da Mamaitua e giugiu be kwa riuute munāḡe? “Gurewa nam tokare aitu tauvoienama e riuena: Aba aubainama umanama kitaguma kuya voiegu?”

<sup>21</sup> Gurewa tauvoienama doḡa teneḡinama e paḡo be na ḡoane nama gurewa verenama be kamai guregurewa e voivoiedina. <sup>22</sup> Be inam kauinama teneḡinama nama. Mamaitua guyau Pero be

Ijpt banegidima ya vinedi da ġarodie na medima be na rewapanama ei maġatarina. Be avedi da Mamaitua ya vinedina da taudi sibo a gurina, be tauna yaġoro mareġa ewai rauriedina.

<sup>23</sup> Be banaga ġesaudima ya vinedina da taudi neneġarinama maumaurinama tokare a paġona. Vutuna aubainama Mamaitua na raukiviverema be na rewapanama taudi ġarodie yai maġatarina.

<sup>24</sup> Be inam banegidima inam tauda, tauna Jius be eteni nopodie ya vinedana.

<sup>25</sup> Maika Mamaitua peroveta Osea ya riuriuena nama,

“Taugu tokare eteni banegidima ya vinedi  
be ya voidi da taudi yau banagama.

Be taudi nuaguma ta paġona,  
avedi da yodi nuaguma nam tima  
paġopaġona.”

<sup>26</sup> Be mate Osea ya riuena,

“Deġo è riuedina, ‘Taumi nam taugu yau banaga’,  
yodi tokare ya riuedina, ‘Taumi Mamaitua  
miamia nonoġinama natunatumama.’ ”

<sup>27</sup> Be peroveta Aisaia Israel aubaina ya riuna umanama,

“Avedi da Israel banegidima sievidima maika  
gimori gerese,  
be raubisaġa tokare ei yawasanidina.

<sup>28</sup> Baninama Mamaitua na ogama ya tarataraġina  
nama,

tokare e voia makaie be e voia rovona.”

<sup>29</sup> Inam maika Aisaia kaite ya vatona,

“Deġoda Bada wairewapana vavasāġinama ba-  
naga raubisaġa sibo nam i gosedi,

tauda tokare Sodom be Gomora banegidima  
tè ruvedi be tè guri rovona.”†

*Israel banegidima nam waisumaḡa ḡarodie*

<sup>30</sup> Be yodi tà kita da eteni banegidima avedi  
da didimana nam ti wanewanena, be yaḡoro  
Mamaitua adi waisumaḡe ya kawa didimanidina.

<sup>31</sup> Be Israel banegidima taudi didimana nam ti  
banavina, baninama taudi didimana tarawatue  
a wanewanena aubainama. <sup>32</sup> Aba aubainama  
didimana nam ti banavi? Baninama taudi a  
nogoti da adi noyama veredie kabe didimana  
ta banavi, be nam waisumaḡe. Taudi yeku‡  
adi kaba saḡaivitarema a saḡai vitarena. <sup>33</sup> Ya  
girugirumina nama:

“Ko kitana, taugu Saionma yeku yà boruboruna,  
be vutuna banaga e voiedi da ta saḡai vitare  
be ta bekuna.

Be aitauna uma yekunama ewai sumaḡena,  
tauna tokare nam tunimayaḡe e mia.”

## 10

<sup>1</sup> Yau bana, taugu nuaguma e ḡoeḡoe kaue  
be Mamaitua yàwai baḡana da tauna sibo Is-  
rael banegidima yai yawasanidina. <sup>2</sup> Taugu è  
kataiena da taudi ta rarau rubu guratana da  
Mamaitua sibo a tainuaverena, be tauna anitai  
nuaverenama na kedama, nam ti katai kauena.  
<sup>3</sup> Taudi Mamaitua na didimana kedanama a ri-  
utuagaie, be taudi adi nogotama nama na ruvae  
didimana kedanama a wanewanena. <sup>4</sup> Be taudi  
nam ti kataiena da Keriso ya voie da tarawatu

† **9:29:** Sodom be Gomora adi gututuma ko sievidina. (Genesis  
19:1-29) ‡ **9:32:** ‘Yeku’ inam Yesu Keriso.

na raḡanima ya kovina. Be aitau da Keriso ewai sumaḡena, tauna tokare didimana e banavina.

<sup>5</sup> Mousis didimana tarawatue umanama ya giuedina, “Aitauḡa uma kaidima yà giugiuedina e voiedina, tauna tokare ḡarodie yawasana e banavina.” <sup>6</sup> Be didimana waisumaḡe inam umanama ya giuedina, “Nam nopomie ko riuna, ‘Aitau e saḡa e naḡo marae be Keriso e yovoḡe?’ ” <sup>7</sup> Bo “Aitau e yovo e naḡo guriguridima adi gabue be Keriso e saḡe?” Ibewa! <sup>8</sup> Inam kaidie nam tokare yawasana ko banavidi. Be you, didimana waisumaḡe umanama ya giuedina, “Yawasana riunama inam ḡaromie; mudumie be nopomie.” Inam riunama vutuna waisumaḡa riunama tauma ka rarau guguyena.

<sup>9</sup> Inam giudima banidima umanama, Deḡoda tam mudume kwa riuna, “Yesu tauna Bada” be nopome kwai sumaḡa da Mamaitua Keriso gurie be ya kawa midisuḡu munaḡena, tam tokare yawasana kenakena nonoḡinama kwa banavina. <sup>10</sup> Baninama dā waisumaḡe tokare Mamaitua e kawa didimanidana, be deḡoda mudude Yesu Keriso tà giuena, tauda tokare Mamaitua ei yawasanidana. <sup>11</sup> Vutuna aubainama girugiruminama umanama ya riuna, “Aitau tauna ḡarone ewai sumaḡana, tauna tokare nam tunimayaḡe e mia.” <sup>12</sup> Yodi uma giunama mayanama maika banaga matabuda, tauda Jius be eteni banegidima matabuda e riuriuedana, baninama Bada tauna tenaḡa, be banaga matabuna ewai badedina, be vere dosidima aitauḡa tauna ḡarone sagu tawai baḡena e uteutedina, <sup>13</sup> baninama

girugiruminama nama ya riuna, “Aitauḡa Bada ḡarone yawasana tawai baḡena, taudi tokare ei yawasanidina.”

<sup>14</sup> Be nema taudi sagu tai baḡe bake, deḡoda taudi Bada nam tai sumaḡe? Be nema Bada tai sumaḡa bake, deḡoda varinama nam ta vaie? Be nema vari verenama ta vaia bake, deḡoda nam aitau ḡarodie e rauguguya? <sup>15</sup> Be nema taudi ta rauguguya bako, deḡoda Keriso taurauguguya nam e riuporaḡa? Girugiruminama umanama ya riuna: “Banaga tawai nuavere kauana raḡanine taurauguguya ta verau be vari verena be suba giunama ta rarau guguyena.”

<sup>16</sup> Be nam Israel banegidima matabudi vari verenama ti paḡona. Inam maika peroveta Aisaia ya riuriuna nama: “Bada, nam banaga toitoi ama giuna ti sumaḡena.” <sup>17</sup> Be yaḡoro Keriso banaga ya riuporedina rauguguya aubainama be adi rauguguyae banaga ta vaie, be tai sumaḡana.

<sup>18</sup> Be Jius banegidima nemanama? Taudi vari verenama nam ti vaie, bo? Ibewa da taudi kaite a vaiena. Baninama girugiruminama porane ya riuna umanama:

“Taudi a rarau guguyana varinama dobu matabuna yai moḡavuna,  
be dobu damodie mate.”

<sup>19</sup> Bo agunai Jius banegidima a vaiena be baninama nam ti katai kaue, bo? Ibewa, taudi a kataiena. Uma kauinama vutuna aubainama Mamaitua Mousis umanama ya riuena:

“Avedi da eteni banegidima buebuedima taudi nam Jius, be tokare ya vinedina.

Yodibe taumi tokare ko unuredi be ko mediedina.”

<sup>20</sup> Be Aisaia mate umanama ya riuna:

“Aitauga taudi nam ti wanewaneguna,  
taudi garodie è mağatara be a banaviguna.”

<sup>21</sup> Be Israel banegidima aubaidima umanama ya riuna:

“Rağan daudaunama taugu aubaimima èwai rabana da sibo garogue koya tavana,  
be taumi nam ko tavana, baninama  
taumi banaga beapotepotemi be  
raraukosoğaiğaimima.”

## 11

### *Israel banegidima tautaugosedima*

<sup>1</sup> Be yodi nemanama? Mamaitua na banagama ya tuağaiedi, bo? Ibewa! Taugu mate Israel banegiguma, Eibraham natunama, be Bendiman na damma nopone.

<sup>2</sup> Mamaitua na banagama boni ya vinevinedina nam i tuağaiedina, ibewa! Elaija na gututuma ko noğoti, rağanine tauna Mamaitua garone ya riubona badobadona Israel banegidima kadi taiye.

<sup>3</sup> Tauna umanama ya riuna: “Bada, taudi am perovetama matabudi ai guri rovodi be am oltama a katiweidina. Be yodi tauguğa yà miamiana, be taudi ta goeğoe da taugu mate tai guriguna.”

<sup>4</sup> Be Bada umanama ya paribeena: “Taugu banaga 7 tausand aubaiguma è taugosağana, baninama taudi nam kokoitau Bal garone ti raudunena.”

<sup>5</sup> Be yodi uma raḡanine kauinama teneḡinama nama. Mamaitua na raukiviveree banaga tautau-gosedima ya vinedina. <sup>6</sup> Tauna na raukiviveree ya vinedina be nam adi noyama debane. Be deḡoda adi noyama debane i vinedina, agunai raukivivere nam baniboruboruna.

<sup>7</sup> Be yodi tà kita, Israel taudi didimana a wanewane guratena be nam ti banavina. Be Mamaitua na vinevinema banegidima taudiḡa didimana a banavina, be Israel banegidima ḡesaudima Mamaitua ya kawa nopobadodina <sup>8</sup> maika girugirumina porane ya riuriuna nama: “Mamaitua arua gewagewanama ya utedi, be uma aruinama taudi ya kawa debabuedi be ya voidi da matedie nam timawai kita be beedie nam timawai beavaiana naumeki da yodi.”

<sup>9</sup> Be Deivid umanama ya riuna: “Taudi adi puyoma soidima sibo ya tikona mu-naḡedi, be a saḡai vitaredina, baninama inam adi kovoḡama.

<sup>10</sup> Taudi sibo arue matedima ai kupikupi da taudi nam sibo ai kita, be raḡan matabuna sibo ḡayawa a kwarina.”

*Eteni banegimima taumi nam ko rauguyaguyau*

<sup>11</sup> Yodi yài taravira munaḡemina. Mamaitua na banagama ya tuaḡai vavasḡedi, bo? Ibewa! Israel banegidima Mamaitua a mia tautauriena, aubainama Mamaitua eteni banegidima ei yawasanidina da Israel banegidima sibo a unurana eteni banegidima ḡarodie. <sup>12</sup> Be

uma ko noḡoti, Israel banegidima taudi Yesu Keriso a tuaḡaiena, aubainama eteni banegidima dobu matabuna yawasana a banavina, Israel banegidima matabudi Yesu tawai sumaḡena raḡanine, eteni banegidima tokare waiaiaina dosinama ta paḡona.

<sup>13</sup> Be taumi aitaḡa nam Jius, taumi yodi ya riuemina: Taugu ei nuaverena da Mamaitua ya riuporeguna taumi eteni banegimima ḡaromie da vari verenama ya rauguguyena. <sup>14</sup> Be uma kauine Jius banegidima nuedima ei medi be taudi mate tai sumaḡana. <sup>15</sup> Be yodi ko kita da, raḡanine Mamaitua Jius banegidima ya riuriu tuaḡaiedina, inam raḡanine dobu matabuna adi gewagewama ya noḡota poredina, be raḡanine Mamaitua Jius banegidima ei anina munaḡedina, aba tokare e tubuḡa? Inam raḡanine banaga guriguridima ta midisuḡu munaḡana. <sup>16</sup> Baninama deḡoda Mamaitua Jius adi dedema pakanama banegidima yai aninedina, naumeki da taudi adi sedama mate Mamaitua tokare ei aninedina. Inam kauinama teneginama maika kai olip. Deḡoda kai olip waraminama yai aninena, naumeki da kai ragedima mate tokare ei aninedina.

<sup>17</sup> Be yodi raḡandie Mamaitua uma kainama ragedima ḡesaudima ya kotovidina, be taumi avedi da doбира olipnama, be ya ragaumi da olip ragedima ya kotokotovidina kividie ya pani wairatumina. Be yodi taumi olip waraminama bodinama na rewapanae taumi ko gogogogona. <sup>18</sup> Vutuna aubainama olip ragedima midimidima noḡodie nam ko seḡara! Be ko noḡoti



da warama nam na yasima taumi. Taumi ami yasima inam warama.

<sup>19</sup> Be agunai taumi umanama ko riuna, “Mamaitua kai olip ragedima ġesaudima ya kotovidina, kividie tauma e pani wairatumaina aubainama.” <sup>20</sup> Inam riukaua, be ko noġoti da taudi nam tiwai sumaġana aubainama Mamaitua ya kotovidina, be taumi Keriso kowai sumaġana aubainama Mamaitua taumi ya pani wairatumina. Vutuna aubainama nam noġodie ko seġara, avedi! Be taumi sibo koya nairana, <sup>21</sup> baninama deġoda Mamaitua kai ragedima veredima i kotovidina, taumi mate tokare ya kotovimina, deġoda taumi nam koi sumaġana.

<sup>22</sup> Be yodi tauda Mamaitua na raukiviverema be na raukivigewagewama tà kitana. Tauna na raukivigewagewama taudi aitauga nam Mamaitua tima vovo teyeteyena ġarodie, be deġoda raġan matabuna koi sumaġana, na raukiviverema taumi ġaromie e kenana, be deġoda ibewa, taumi mate e kotova poremina. <sup>23</sup> Be deġoda Jius banegidima waisumaġa tai kare munaġana, taudi tokare Mamaitua e pani wairatu munaġedina, baninama na rewapanama e kenakenana da nama e voiana.

<sup>24</sup> Be avedi da taumi dobira olipnama, be yaġoro Mamaitua ya paġomi da olip verenama bogane ya pani wairatumina. Vutuna aubainama tauna tokare teneteneġinama da olip verenama ragedima ya kotokotova poredina, kividie e pani wairatu munaġedina.

*Mamaitua tokare Israel banegidima ei yawasanidina*

<sup>25</sup> Yau bana, uma inam riukaua semosemonama yà riuriuemina da taumi ko kataie be nam ko kawa saḡe munaḡemi Israel banegidima noḡodie. Inam riukaua da Mamaitua Jius banegidima ḡesaudima ya kawa nopobadodi da nam ti sumaḡana. Inam kauinama nama Mamaitua ya voie da eteni banegidima sievinama ya noḡonoḡotina paratine nama ei yawasanidina, <sup>26</sup> yodibe Israel banegidima mate ei yawasanidina maika girugiruminama poranama ya riuriuna nama:

“Tauwai yawasana Jerusalemḡa e verau

be e voie da Jeikob na damma Mamaitua tai nuapaḡo munaḡena.

<sup>27</sup> Be taugu waiantina yà uteutedina raḡanine, adi gewagewama yà noḡota poredina.”

<sup>28</sup> Yodi taudi vari verenama a tuaḡaiena, vutuna aubainama taumi eteni banegimima yawasana ko paḡona, be Jius taudi Mamaitua na ḡaviama. Baninama Mamaitua Jius adi dedema pakanama banegidima ya vinedina, taudi kadi taiye Jius banegidima yaḡoro tauna na banagama, <sup>29</sup> baninama Mamaitua na giu be na puyoma nam airaḡan nuanama e vitaredi be e kaiporaḡa munaḡedi. <sup>30</sup> Taumi noḡone eteni banegimima, taumi Mamaitua koya rawarawa ḡaiḡaiena. Be yodi taumi Mamaitua na raunua-toima koya paḡona, baninama Jius banegidima Mamaitua a rawaḡaiḡaiena aubainama. <sup>31</sup> Be tokare taudi mate Mamaitua na raunua-toima ta paḡona, avedi da taudi yodi ta rawarawa

gāigaiena, baninama Mamaitua na raunuatoima taumi gāromie aubainama. <sup>32</sup> Be yodi tà kita da banaga matabuna adi rawagāigāie Mamaitua ya panidina, inam kedane tokare matabudi Mamaitua na raunuatoima ta paḡona.

### *Pol Mamaitua e kaikai suḡusuḡuna*

<sup>33</sup> O kapore! Aba kam Mamaituama tam kuya vere gāḡa kè banavim. Am nuauyuyama be am kataima ya saḡa vavasāḡa be ya yovo guratana. Tauda nam tenetenēḡina da Mamaitua na yawasana be na kovoḡama tà kataiedi. <sup>34</sup> “Aitau Mamaitua na noḡotama ya kataie? Be aitau tenetenēḡina da Mamaitua e raukure?” <sup>35</sup> Bo “Aitau aba Mamaitua ya ute da yodi Mamaitua tauna ei maesi munaḡe?” <sup>36</sup> Yaba matabuna taune da ta tubutubuḡana, be tauna na rewapanae ta kenakenana. Tauna tà kaisuḡusuḡu nonoḡena. Inam riukaua!

## 12

### *Dà yawasanama sibo Mamaitua tè utena*

<sup>1</sup> Yau bana, yodi Mamaitua na raunuatoie yà riuriu vavasāḡemina da tubuḡimima Mamaitua ko utena. Be raḡanine tubuḡimima Mamaitua ko uteutena, inam vutuna puyo babau yawayawasaninama. Dabudine Mamaitua ei nuaverena, baninama uma kauinama inam riukaua taparoronama, Arua Babau nama e ḡoeḡoena. <sup>2</sup> Be nam dobu banegidima adi vaivaie ko mia, avedi! Be Mamaitua koi baḡa da ami noḡotama

e vitare di be taumi ami yawasanama e rawavau-dina. Yodibe taumi tokare teneteneginama da Mamaitua na goana be na verema ko kataiedina. Be Mamaitua na goanama inam ya vere vavasaḡana.

<sup>3</sup> Taugu Mamaitua na apasolma, vutuna aubainama ya riuriu vavasaḡemina: Nam ko noḡota munaḡemi da taumi koya saḡa guratana, ibewa da Mamaitua taumi tenatenagaḡa ami waisumaḡama ya uteutemina, na ruvae nama ko noḡota munaḡemina. <sup>4</sup> Tauda tubuḡidama tenaḡa be ragaragadama toitoi, be raga tenaḡaḡa adi noyama tabu be tabu. <sup>5</sup> Be uma kauinama tenegine tauda toitoi be tubuḡa tenaḡa Yesu Kerisoe, be taune tauda matabuda tei rawa teḡeidana.

<sup>6</sup> Be matabuda da noyama tabu be tabu, Bada puyo tabu be tabu ya uteutedana na ruvae nama. Aitaḡa da tauwai peroveta, naumeki da tai perovetana adi waisumaḡama ruvane. <sup>7</sup> Aitaḡa da tauwai sagu, naumeki da tai saguna, be aitaḡa da tauwai katakatai, naumeki da tai katakaina, <sup>8</sup> be aitaḡa da taurauduḡu, naumeki da ta rauduḡuna, be aitaḡa da taupaipairu, naumeki da riukaue ta pairuna, be aitaḡa da tauwai bada, naumeki da nuedima tabutabune tai kedadoka kauana. Be aitaḡa da taurau nuatoi, naumeki da ma nuaveredi banaga ta sagudina.

### *Kuristen na yawasanama*

<sup>9</sup> Ami wainupaḡoma ami banagama ḡarodie nam kaiyovue. Yaba gewegewedima ko tuagaiedi be yaba veredima ko kaidididina. <sup>10</sup> Nuemima tabutabune ami banagama mate koi nuapaḡo

be koi kawa vivira munaḡa! <sup>11</sup> Be nam airaḡan matemima e gayawa, be raḡan matabuna nuemima tabutabune Bada aubainama ko noya!

<sup>12</sup> Ko noḡoti da raḡan tenaḡa taumi tokare ko naḡona marae, vutuna aubainama koi nuavere! Be piripiri raḡandie ko vataradidi be ko moiragi nonoḡa! <sup>13</sup> Mamaitua na banagama waikaruwaḡewaḡedima ko sagudi! Be deḡoda vaḡavaḡai be ya tavana, ko rabe kauena!

<sup>14</sup> Aitauḡa da ta raraukivi gewegewemina, naumeki da taudi aubaidima ko moiragi be Bada ei aiainidi! Taumi banaga koi aiainidina be nam koi taratautauedi! <sup>15</sup> Deḡoda aitauḡa tawai nuaverena, naumeki da taumi mate koi nuaverena, be deḡoda aitauḡa ta ḡabaḡabana, naumeki da taumi taudi mate ko ḡabana. <sup>16</sup> Taumi subae ko mia be nam ko rauguyaguyau, be nam ko kawa saḡe munaḡemi! Kamai banabanaga mate koi turaturanana. Be nam ko noḡoti da taumi banaga katakataimi!

<sup>17</sup> Gewagewa nam gewagewae koi maesi. Be ko kita kaua da banaga matabudi matedie taumi didimanae ko miana. <sup>18</sup> Ko raurubu da banaga matabudi mate subae ko miana. <sup>19</sup> Yau bana, nam biwa ko paḡo, be ko gose da Mamaitua tau-naḡa e raubiwana, baninama girugiruminama poranama ya riuna umanama,

“Bada ya riuna, ‘Taugu taurau biwa be taugu tokare ami biwama ya paḡona’.

<sup>20</sup> Deḡoda am ḡaviama kani e karatina, naumeki da kani kwa utena  
be deḡoda nuanama e raukasakasana,  
naumeki da upa kwa ute!

Deḡoda am ḡaviama ḡarone nama kwa voiana,  
debane upa kwa ḡini pore be tauna e tuni-  
mayāḡana.”

<sup>21</sup> Gewagewa nam tam e vaisubam, be tam veree  
gewagewa kwa vaisubana!

## 13

### *Gabeman ko voteyeteyedi*

<sup>1</sup> Banaga matabuna sibo gabeman a  
voteyeteyena, baninama gabeman matabudi  
adi rewapanama inam Mamaitua ya utedina.

<sup>2</sup> Vutuna aubainama aitu gabeman ḡarodie e  
paripari viravirana, tauna Mamaitua ḡarone  
mate e paripari viravirana, tauna tokare kovoḡa  
e banavina. <sup>3</sup> Tam deḡoda vere kwa voivoiena,  
inam raḡanine tam tokare nam pirisiman  
kwa nairedina. Be deḡoda gewagewa kwa

voiena, inam raḡanine tam tokare pirisiman  
kwa nairedina. Vutuna aubainama tam deḡoda  
naira kwa tuaḡaiena, naumeki da vere kwa voie  
be taudi tokare tam isamma ta kawa saḡena.

<sup>4</sup> Baninama Mamaitua gabeman ya riuporedina  
da taudi tam ta sagumna aubainama, be deḡoda  
tam gewagewa kwa voiena, inam raḡanine taudi  
kwa nairedina, baninama Mamaitua rewapana  
ya utedina da taudi tam tokare ta kovoḡimna.

<sup>5</sup> Vutuna aubainama gabeman aba ta riuriuena,  
naumeki da kwa voiena, inam raḡanine am  
noḡotama tokare verenama e kenana. Be mate  
tam tokare nam kovoḡa kwa banavi.

<sup>6</sup> Raḡan matabuna gabeman ta noyanoyana  
Mamaitua aubainama, vutuna aubainama taumi

teks koi maesidina. <sup>7</sup> Nama banaga matabudi adi kauama ko utedina. Deḡoda teks sibo koyai maesidina, naumeki da koi maesina, be aitauga sibo koya voteyeteyedina, naumeki da ko voteyeteyedina, be aitauga sibo koya viviredina, naumeki da ko viviredina.

### *Wainuapaḡo na riuvasasaḡama*

<sup>8</sup> Nam aitau na maesama ko rabe kwase. Be raḡan matabuna umanama koi nuapaḡo vivirana. Baninama deḡoda banaga ḡesaudima koi nuapaḡoedina, inam vutuna taumi tarawatu ko vovo teyeteyena. <sup>9-10</sup> Be inam raḡanine tokare nam aba gewagewanama taudi ḡarodie ko voie. Maika riuvasasaḡa e riuriuna nama, “Nam turamma debane mui kwa pore, be nam kwa rauvunuḡa, nam na purapurama kwa danenedi, nam kwai kwina”. Be riu vavasaga ḡesaudima mate, matabudi a rawateḡeidina giu tenaḡa nopone, be giunama inam umanama: “Turamma turamma nuamma e paḡona, maika tamḡa kwawai nuapaḡo munaḡemna nama” Vutuna aubainama deḡoda banaga ḡesaudima ḡarodie koi nuapaḡona, inam vutuna taumi tarawatu ko vovo teyeteyena.

### *Yanae ko miana*

<sup>11</sup> Naumeki da nama ko voiana, be yodi raḡandima kitedima ko katai kauedina. Bani-nama Bada na raḡanima kaiteka e tavatavana, nam maika boni raḡandie tauda waisumaḡa tēwai karee nama. Vutuna aubainama matemima e kaya. <sup>12</sup> Kupi ḡaubonaḡa e kovina, be raḡan kaiteka e tomtomna. Vutuna aubainama kupi na

voiamā tā gosedi, be yana na madama tā ragaudina. <sup>13</sup> Tauda matabuda didimanae tā miana, maika banaga suare e miamiana nama. Tauda nam kaua gewegewedima soidima tā voiedi, nam tā tego bua, nam t̄ai soḡa yabayababa, nam tā iḡara yabayababa, bo tā unura. <sup>14</sup> Inam yabedima avedi, be Yesu Keriso na ḡoane nama ko miana. Be nam gewagewa ko wanewanedi da tubuḡimima na ḡoanama kededima gewegewedima ko voiedi, avedi!

## 14

*Banaga adi waisumaḡama gwaḡegwaḡedi be wairewapanidima*

<sup>1</sup> Aitaḡa da ami waisumaḡama wairewapanidima taumi ami banagama ḡesaudima adi waisumaḡama vogwaḡegwaḡedima sibo koya kaisagudina. Be nam adi wainua noḡonoḡotama debedie koi kawa riuriu! <sup>2</sup> Banaga aitaḡa adi waisumaḡama wairewapanidima, taudi nam ai kani tima widiwidinena, ibewa da taudi kani matabuna ta kanikani yabayababedina. Be banaga ḡesaudima aitaḡa adi waisumaḡama vogwaḡegwaḡedima, taudi nam musara tima kanikanina.\* <sup>3</sup> Vutuna aubainama aitaḡa da kani kanikani yabayababinama, tauna banaga

---

\* **14:2:** Banaga aitaḡa adi waisumaḡama vogwaḡegwaḡedima, taudi nam musara ti kanikanina, baninama taudi nam ti katai kauena deḡoda inam musara veredi bo boita a puyopuyodina museridi. Be aitaḡa adi waisumaḡama wairewapanidima, taudi musara a kanikani yabayababedina. Be uma kauinama teneginama vers 5 nopone, dabudine nam musara be raḡan vinevinedima.



musara tautuaḡaienama, nam sibo ya kita tuaḡaie. Be aitu da nam musara taukanina, tauna banaga kanikani yabayababinama nam sibo ya etare, baninama taudi adi waisumaḡama ruvane Bada yai aninedina. <sup>4</sup> Tam aitu da Bada na taunoyama kwa etaredi? Tam nam dobudi am noyama aba ima kenakenana. Taudi Bada na taunoyama aubainama taunaḡa ya kataiedina, da taudi a beku bo ibewa. Be taudi tokare nam ta beku, baninama taudi Bada na rewapanae ta midimidina.

<sup>5</sup> Banaga adi waisumaḡama gwaḡegwaḡedima taudi raḡan dosidima vinevinedima ta viviviviredina. Be banaga ḡesaudima ta noḡonoḡotina da raḡan dosidi be raḡan ḡoma matabudi tenetenḡidima. Be banaga tenatenagaḡa nuane ei nuanonoḡota da deḡo tauna ḡarone ya vere. <sup>6</sup> Aitu da raḡan dosidima vinevinedima e viviviviredina, naumeki da tauna nama e voiena, Bada isanama anikaisuḡunama aubainama. Be aitu nam kani matabudi ima kanikanidina, bo aitu da kani matabudi e kanikanidina, naumeki da matabudi nama ta voiana Bada isanama anikaisuḡunama aubainama, baninama noḡone taudi ta moiragi be ta kanikanina aubainama. <sup>7</sup> Tauda nam aitu mabide tama miamia bo mabide tama gurigurina, <sup>8</sup> ibewa da tauda ta miamia bo ta gurigurina, inam matabuna Bada aubainama, baninama tauda inam tauna ḡaroḡaronama. <sup>9</sup> Vutuna aubainama Keriso ya guri be ya midisuḡu munaḡana, da banaga yawayawasanidi be guriguridima, matabudi ewai badedina.

<sup>10</sup> Be yodi tam aba aubainama turamma kwa

etare? Bo aba aubainama turamma kwa kitakita tuaḡaie? Tauda matabuda tokare Mamaitua noḡone tà midi, be taunaḡa tauda tenatenāḡa e etaredana, <sup>11</sup> maika girugiruminama porane Mamaitua ya riuriuna nama:

“Taugu Mamaitua miamia nonoḡiguma, be ya riuriu kauemina da tokare banaga matabudi kaḡapakague tuapikedima tai tutumidiridi da ta rauduneegu

be matabudi mududie tai maḡatarigu be ta riuna: ‘Tam riukaua Mamaitua.’ ”

<sup>12</sup> Be yodi tà kita da tauda tenatenāḡa tokare dà kauama matabudi Mamaitua noḡone tai maḡataridina. <sup>13</sup> Vutuna aubainama nam turamma turamma kwa etare, avedi! Be kwa kita da nam anibeku kaudie turamma kwa voie da na waisumaḡe e beku.

<sup>14</sup> Bada Yesu ya riuegu be è katai kauena da nam aba kaninama Mamaitua matane i miramirana. Be deḡoda aita e noḡoti da aba kani-nama ya miramirana, naumeki da tauna ḡarone uma kaninama ya miramira kauana. <sup>15</sup> Be deḡoda am kani yabayababama aubainama turamma kwai nuaboyana, inam kauine tam nam turamma kumawai nuapaḡoena. Nam am kani yabayababama aubainama turamma kwa voie da na waisumaḡe e beku. Baninama Yesu ya gurina tauna mate aubainama. <sup>16</sup> Be raḡanine am ḡoanama nama uma yabedima kwa voivoiedina, kwa kita da am banagama nam tai giugiuem.

<sup>17</sup> Mamaitua na waiguyaue kani be tego inam nam baniboruboruna. Ibewa da didimana, suba

be mosari Arua Babaue, inam vutudi yaba dosidima. <sup>18</sup> Be deḡoda uma kaudie Keriso ḡarone koi taunoyana, inam vutuna Mamaitua ewai aninemina, be banaga ta viviremina. <sup>19</sup> Tauda vutuna aubainama tà raurubu gurata da suba yabedima tà voiedi be yaba ḡesaudima mate tà voiedi da, dà waisumaḡama tà rewapanana.

<sup>20</sup> Nam kani kadi taiye Mamaitua na noyama ko kawa gewegewedi! Kani matabudi inam veredima be deḡoda yaba tenaḡa kuya kanikani be turamma kuya voie da na waisumaḡe ya bekuna, inam tam gewagewa kuya voiena. <sup>21</sup> Vutuna aubainama deḡoda tam musara kuya kanikani bo bia† kuya tegotego, bo aiyaba ḡesaudima kuya voivoiedi, be inam yabedie turamma na waisumaḡama vogwaḡagwaḡanama kuya voie da ya bekuna, ya verena da uma kaudima nam kwa voiedi. <sup>22</sup> Deḡoda uma kaudie am waisumaḡama ewai rewapana kauana, naumeki da tam be Mamaitua taumiḡa ḡaromie e kena kwasana. Ya verena da uma kaudie tam nam kwa noḡota bekubeku, baninama tam kuya kataiena da uma kaudima matabudi inam naumeki. <sup>23</sup> Be tam deḡoda uma kaudie kwa noḡota bekubekuna, tokare Mamaitua e etaremna, baninama tam nam waisumaḡe uma yabedima kuma kanikanidina. Yaba matabuna nam waisumaḡe kwa voiedi, inam taudi gewagewa.

## 15

<sup>1</sup> Tauda aitaḡa dà waisumaḡama wairewapaninama, naumeki da aitaḡa adi waisumaḡama

† 14:21: Gurik bonane inam “waen”.

gwaḡegwaḡedima sibo tē sagudina, be nam tau-  
daḡa tà sagusagu munaḡeda. <sup>2</sup> Be tauda tenate-  
naḡaḡa sibo dà banagama tē sagudi da adi  
waisumaḡe sibo ai rewapanana. <sup>3</sup> Baninama  
Keriso nam taunaḡa i sagu munaḡena, ibewa  
da girugiruminama porane umanama ya riuna:  
“Banaga tam a kunuremna be inam kunurinama  
taugu mate a kunureguna.” <sup>4</sup> Riuwai noḡota  
matabudi boni a girugirumidina, inam taudi  
waikatakataidama aubainama, da e duḡuda be  
waisumaḡe tòi rewapanana da tokare tà naḡona  
marae.

<sup>5</sup> Mamaitua, vutuna e duḡuduḡumi be e  
sagusagumina da ami waisumaḡe piripiri  
matabudi ko dami poredina, tauna ya  
voiemi da taumi nuemima tenaḡa Keriso  
koi muriwatanena. <sup>6</sup> Yodibe taumi tokare  
tenetenēḡinama da Mamaitua isanama ko  
kaisuḡusuḡu tenaḡena. Vutuna tauna dà Badama  
Yesu Keriso Tamanama.

<sup>7</sup> Taumi ami banabanagama koi aninedina,  
maika Keriso taumi yai aninemina. Uma kauine  
nama taumi tokare Mamaitua isanama ko kaikai  
suḡusuḡuna. <sup>8</sup> Ko noḡoti da Yesu Keriso ya yovo be  
ewai maḡatarana da Mamaitua na saugama Jius  
adi dedema pakanama banegidima ḡarodie inam  
riukaua. Be inam kauine nama Jius banegidima  
e sagusagudina. <sup>9</sup> Be mate tauna ya yovona da  
eteni banegidima ei yawasanidina, da taudi sibo  
Mamaitua isanama a kaisuḡusuḡuna na rauki-  
viverema aubainama, maika girugiruminama  
porane umanama ya riuna:

“Vutuna aubainama taugu eteni banegidima

noḡodie isamma yà kaisuḡuna.

Be taugu yà sarena isamma anikaisuḡunama aubainama.”

<sup>10</sup> Be mate ya riuna,

“Taumi eteni banegimima matabumi tauna na banagama mate ko mosari tenaḡana.”

<sup>11</sup> Be mate ya riu munaḡana,

“Taumi eteni banegimima matabumi Bada isanama ko kaisuḡu, be matabumi isanama anikaisuḡunama saredima ko saredina.”

<sup>12</sup> Be peroveta Aisaia ya riuna,

“Guyau vaunama Jese na dame e tubuḡana, be tauna tokare banaga matabudi ei badedi, be eteni banegidima matabudi tauna tai sumaḡena.”

<sup>13</sup> Vutuna aubainama taugu yà moimoiragina taumi aubaimima da taumi Bada koi sumaḡe, be Mamaitua tauna mosari be suba nopomima ei moḡavuna. Be dabudine Arua Babau na rewapanama mate nopomima ei moḡavuna. Be taumi ko kataie da tokare Mamaitua neneḡarinama e utemina.

*Pol uma letanama ya girugirumina, ya giuena*

<sup>14</sup> Yau bana, taugu è katai kauena da taumi banaga veremima be uma giudima koya katakatai kauedina be taumi teneteneginama tokare ami banagama mate koi kawa raukuravivirana. <sup>15</sup> Taugu uma letanama ma raudebatoragu è girumina taumi ḡaromie, da uma yabedima yà riuwainoḡotimina aubainama. Taugu nama è voiana, baninama Mamaitua na

raukiviveree <sup>16</sup> taugu Yesu Keriso na taunoyama. Taugu maika pirisi, baninama eteni banegidima ġarodie Mamaitua varinama verenama yà rauguguyena, be taugu yà ġoeġoena da eteni banegidima yà verauġedina Mamaitua ġarone maika puyo, nama Mamaitua e ġoeġoena. Be Arua Babau e voiedi da taudi Mamaitua na banagama ta tubuġana. <sup>17</sup> Taugu Mamaitua na taunoyama, be nuaguma ya verena da Yesu Keriso ya riuporeguna, vari verenama yà rauguguyena aubainama. <sup>18-19</sup> Be yodi taugu nam yaba ġesaudima ama giugiuemina, be abaġa Keriso ya voivoiedina, vutudiġa yà giuedina: Arua na rewapanae taugu mataira be voia dosidima è voiedina, be inam kauine Bada Yesu rewapana ya uteguna da eteni banegidima yài katakataidi da taudi Mamaitua ta voteyeteyena. Be taugu Jerusalemma Keriso varinama rauguguyenama èi karena, naumeki da Ilirikumma è tavana.

<sup>20</sup> Taugu raġan matabuna yà ġoeġoena da vari verenama yà rauguguyena banaga aitauġa Yesu Keriso nam ti katakataiena ġarodie. Be aitauġa Yesu Keriso varinama a vaivaiena, taudi ġarodie nam yà naġo, baninama taugu nam banaga na tuatuama yawai midiri dokena nonoġinama debane vada yà keru. <sup>21</sup> Taugu yà voiena maika girugiruminama porane ya riuriuna nama,

“Taudi aitauġa rauguguya nam ti vaivaiena, taudi tokare ta vaie be ta kitana.  
Be aitauġa da nam varinama ti vaivaiena,  
taudi tokare ta kataiena.”

<sup>22</sup> Vutuna noĝotine raĝan toitoi verau è raurubuenta da sibo ĝaromie è verauna, be nam teneteneĝina.

*Pol Rom naĝonama e ĝoeĝoena*

<sup>23</sup> Be yodi uma dobudine yau noyama ya kovina. Suara da suara taugu è ĝoeĝoena da taumi sibo è kitemina, <sup>24</sup> vutuna aubainama yodi taugu yàwai ogana da yà kitemina Spein naĝonama raĝanine. Be raĝanine taugu ĝaromie yà tavana, dabudine taugu taumi mate tòi nuavere be tàmiana raĝan ĝaubonaĝa. Be muriĝa taugu yà ĝoeĝoena taumi ko sagugu da Speinma yà naĝona.

<sup>25</sup> Be yodi taugu yà naĝonaĝona Jerusalemma, Mamaitua na banagama kaisagudima aubainama. <sup>26</sup> Baninama Masedonia be Akaiama tauwai sumaĝa banegidima ma nuaveredi mane a uteguna da taugu Jerusalemma tauwai sumaĝa ĝesaudima waikaruwaĝewaĝedima sibo è utedina. <sup>27</sup> Taudi riukaua, ma nuaveredi mane a uteguna. Be taugu yà noĝonoĝotina da inam naumeki nama a voiana, baninama eteni banegidima taudi varinama verenama Jius ĝarodie a paĝona, vutuna aubainama naumeki da tubuĝe sibo a sagudina. <sup>28</sup> Be raĝanine Jerusalemma tauwai sumaĝa waikaruwaĝewaĝedima mane ya utedi e kovikovina murine, taugu yau vaĝaima yài karena Spein aubainama. Be inam raĝanine taugu yà vakitemina. <sup>29</sup> Taugu è kataiena da raĝanine ĝaromie yà veraverauna, Keriso waiainama dosinama e uteguna taumi aubaimima.

<sup>30</sup> Yau bana, Bada Yesu Keriso isane be Arua na wainuapaḡoe taugu yàwai baḡa vavasagēmina da yau pirpirie ko sagugu da Mamaitua ḡarone aubaiguma ko moiragina. <sup>31</sup> Ko moiragi da Mamaitua e midi ḡaḡarigu da Judia banegidima gewegewedima nam sibo a vunuḡigu. Be mate ko moiragi da yau noyama Jerusalem nopone tauwai suamaḡa sibo ai aninena. <sup>32</sup> Yodibe Mamaitua na ḡoane taugu ma nuaveregu yà tavana taumi ḡaromie da yà sipere, be taumi mate tòi nu-avere tenaḡana. <sup>33</sup> Mamaitua, suba tauvoienama taumi matabumi ḡaromie. Inam riukaua.

## 16

### *Pol na waikaiwama*

<sup>1</sup> Taugu nuvudama Fibi ḡaromie yàwai maḡatarina. Tauna Senkiria ekalesia adi taunoyama waivinama. <sup>2</sup> Be yàwai baḡemina da tauna ko rabe kauena, nema Bada na taunoyama ḡesaudima ko raberabe kauedina nama. Baninama tauna banaga toitoi e sagusagu kauedina be taugu mate.

<sup>3</sup> Yau banagama Prisila be Akwila\* ko riuedina yàwai kaiwedina, taudi Yesu Keriso na noyae taुकaisaguguma. <sup>4</sup> Be mate taudi adi yawasanama a tuaḡaiedi be ai uta munaḡedi da ai sasanana, saguguma aubainama. Be inam kauinama aubainama taugu yàwai kaiwa vavasagedina, nam tauguḡa be eteni nopodie ekalesia matabudi mate kawai kaiwedina uma kauinama aubainama. <sup>5</sup> Be ekalesia Prisila be

---

\* **16:3:** 'Prisila' tauna waivi, be na badama 'Akwila'.



Akwila adi vadae tawai rawategeidina mate yawai kaiwedina.

Be tura yaḡaguma Epainetas mate ko riuena yawai kaiwena, tauna vutuna Eisia provinsnama nopone yai Kuristen dokana. <sup>6</sup> Meri ko riuena yawai kaiwena, tauna vutuna aubaimima ya noya guratana. <sup>7</sup> Andronikus be Junias ko riuedina yawai kaiwedina. Taudi rabui taugu yau damma nopone be dibure a biri tenaḡemaina. Apasol matabudi taudi rabui a vivivivira kauedina, taudi Keriso ai sumaḡa dokena, muridie taugu èi sumaḡana. <sup>8</sup> Ampliastas ko riuena yawai kaiwena, baninama Bada na wainuapaḡoe tauna turaguma. <sup>9</sup> Urbanus ko riuena yawai kaiwena, tauna Yesu Keriso na noyae taukaisagumaima. Be tura yaḡaguma Stakis mate, ko riuena yawai kaiwena.

<sup>10</sup> Apeles ko riuena yawai kaiwena, tauna na waisumaḡama Kerisoe a kita da yai rewapana kauana. Be Aristobulus na vadama banegidima mate ko riuedina da yawai kaiwedina. <sup>11</sup> Herodion ko riuena yawai kaiwena, tauna yau damma nopone. Be Nasisus na vadama banegidima mate ko riuedina yawai kaiwedina, taudi matabudi Bada tauwai sumaḡenama. <sup>12</sup> Tiripina be Tiriposa ko riuedina yawai kaiwedina, inam waiwaividima rabui taudi Bada ḡarone ta noyanoya guratana. Be turaguma Parisi mate ko riuena yawai kaiwena, inam waivinama mate Bada ḡarone ya noya guratana. <sup>13</sup> Rupas ko riuena yawai kaiwena, tauna Bada ya vinena, be tinanama mate ko riuena yawai kaiwena, bani-nama tauna ya rabeguna maika kabe tinaḡomigu.

<sup>14</sup> Asinkiritas, Pelegon, Hemes, Patorobas ko riuedina matabudi yàwai kaiwedina. Be Hemes na banagama ḡesaudima ḡarone, mate ko riuedina da yàwai kaiwedina. <sup>15</sup> Pilogolus, Julia, Nereus be nuvunama mate, be Olimpas be tauwai sumagā matabudi tauna ḡarone, ko riuedina da matabudi yàwai kaiwedina. <sup>16</sup> Be Keriso na ekalesiana matabudi adi waikaiwama taumi ḡaromie. Be wainuapaḡoe koi kaiwa vivirana waisuruva mate.

*Pol na giuma damonama*

<sup>17</sup> Yau bana, yà riuriu vavasagēmina da ko kita kauana, banaga aitaugā ekalesia taudariḡedima, nam koi turanedi. Baninama aba waikatakatainama koya paḡopaḡona, inam banegidima ami waisumaḡe tokare ta kawa gewegewemina. <sup>18</sup> Inam banegidima taudi nam Yesu Keriso na noyama tima voivoiena, be taudiḡa ta sagusagu munaḡedina. Adi giu yaḡayaḡae be adi gwayae taudi banaga adi noḡotama vogwaḡegwaḡedima tawai kedadoka waigewedina. <sup>19</sup> Banaga matabudi a vaiemi da taumi matabumi Bada ko vovo teyeteyena. Vutuna aubainama nuaguma ya vere kauana. Be taugu yà ḡoēḡoena da taumi raḡan matabuna vere adi kedama ko katai kauedina. Be gewagewa kedane nam ko naḡo. <sup>20</sup> Raḡan ḡaubonaḡa Mamaitua suba tauvoienama tauna e voiemida Seitan kaḡemie e vapisana. Be dā Badama Yesu na raukiviverema ḡaromie e kenana.

<sup>21</sup> Timoti Yesu Keriso na noyae taukais-aguguma, tauna ewai kaiwemina. Be yau damma

banegidima Lusias, Jeson be Sosipata, taudi mate tawai kaiwemina.

<sup>22</sup> Taugu Tertius, vutuna Pol aba e giugiuena yà girugirumina, Bada isane yàwai kaiwemina.

<sup>23</sup> Be Gaiyas mate ewai kaiwemina, tauna na vadae taugu be ekalesia kawai rawateḡeimaina. Be Erastas tauna uma meagaina mane tau-rabenama, be turadama Kwatius, taudi mate tawai kaiwemina. <sup>24</sup> Bada Yesu Keriso na raukiviverema matabumi ḡaromie e kenana. Inam riukau!†

*Bada isanama tà kaisuḡuna*

<sup>25</sup> Taugu yodi vari verenama ḡaromie è rauguguyena, aubainama Mamaitua nimane yà biribirimina, da tauna vutuna e rabe kauemi be e voiemida ami waisumaḡe koi rewapanana Bada isane. Inam Mamaitua na ogama taumi eteni ḡaromie da yawasana ko paḡona. Pakane boni uma kauinama semosemonama. <sup>26</sup> Be yodi Mamaitua ya riu vavasagaḡana da inam varinama verenama dobu matabuna tà rauguguyena da banaga matabudi Keriso tai sumaḡe be ta voteyeteyena. Peroveta nama a girumina. <sup>27</sup> Mamaitua taunaḡa nuauyauya baneginama. Tauna Yesu Kerisoe yaba matabudi ya voiedina. Vutuna aubainama tauda isanama tà kaisuḡusuḡu nonoḡena. Inam riukau.

---

† **16:24:** Gurik baibol ḡesaudine uma versnama 24 nam ima kenakenana.

**Vari Verenama**  
**The New Testament in the Dawawa Language of**  
**Papua New Guinea**  
**Nupela Testamen long tokples Dawawa long Niugini**  
copyright © 2002 Wycliffe Bible Translators, Inc.

Language: Dawawa

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2015-01-02

---

PDF generated using Haiola and XeLaTeX on 21 Feb 2024 from source files dated 31 Aug 2023

9b8bda32-db42-5be3-9d24-4e4a5d5f65b2